

MAKASI EBONGI BE NA NZELA YA BOLEMBU EBONGI BE



Mbote, bandeko. Ezali esengo koya lisusu awa na ntongo ya lelo, ntongo oyo mbúla ná neige ezali kokweya mbala moko. Nayebi ete ezalaki pete te mpo na mingi na bino, kokumba mituka, wana bouti mosika. Pe tozali na . . . baninga ya motuya kouta na Chicago, na Alabama, na Georgie, na Tennessi, na Illinois pe nzinganzinga, mikolo oyo, na bongo tozali . . . tondimi solo ete Nzambe akopesa bino kimia na Ye ntango bokosala mobembo. Pe ezali libondeli na biso ete Ábatela bino na banzela, na ba-nzela oyo ya makámá ndenge ekómaka na moselú na eleko ya hiver. Pe etúka oyo ezalaka mabe na hiver. Ezalaka etúka ya kitoko koleka na printemps to na automne, kasi na hiver pe na été ekómaka mabe mpenza.

² Sikawa, nandimi te ete kuna, basili kobanda kotia yango na bande. Nalingi koloba bobele likambo moko na liteya ya lomingo eleki. Ntina oyo na—napekisaki bande yango pe naboyaki kotika bango kotéka bande yango, kobimisa yango, ee, ezalaki mpo nasengeli liboso koyoka yango malamú. Mpo mbala mingi, ndenge wana, nalobaka makambo awa na losambo, oyo nakoki koloba yango bongo te liboso na bato mosusu, mpo ntango mosusu ekobetisa bato mabakú. Pe ntango mosusu ebotaka ata mituna kati na bato ya mongombo na biso awa. Pe ezali . . .

³ Pe nalobi yango te (koloba makambo yango) mpo na kozala na bokesene, kasi mbala mosusu, na nse ya epakweli, oyebi makambo oyo okoki te . . . okokoka koyebisa bato te. Bongo, mbala mosusu, na nse ya epakweli, eloko moko ekoki kobima, bomoni, pe okebi na yango te. Pe moko na makambo oyo nandimaka elobamaki (lomingo eleki), oyo ekoki kosala ete moto moko . . . ntango nalobaki ete nandimaka ata moke te likambo ya kobenga bato na etumbelo. Bomoni?

⁴ Nalingi koloba yango pe kotalisa yango polele mpo bósosola. Na Biblia mobimba, batíkálá kobenga bato na etumbelo ata moke te. Kati na Makomi, likambo yango ezali te. Esálema esika moko te kati na bileko, kino eleko ya ba-Methodiste, eleki pene na mibu nkama mibale, bomoni.

⁵ Kobenga bato na etumbelo, ezali ntango bato batelemaka awa mpo na koluka kondimisa bato na makasi: “Yaka, Yoane. Oyebi, bango . . . Mama na yo akúfáki, kobondela mpo na yo. Yaka, Yoane.” Wana ezali kondima na yo moko te, baninga. Te. Na—na lolenge wana, ngai . . . koyoka ete moto ya ndenge wana akei mosika mpenza, ezalaka mingi te. Pe, kati na yango, okozua

makambo ya ndenge na ndenge. Yango wana lingomba ekómi na mobulu ndenge ekómi lelo, ezali mpo na makambo ya boye.

⁶ Mpo na moto kondima mpenza, esengeli na yo te koloba likambo, ndeko, Nzambe azali wana pe asilá kosala mosala. “Wana Petelo azalaki koloba Maloba oyo, Molimo Mosantu akitaki likolo na bato oyo bazalaki koyoka Liloba.” Bomoni? Bomoni? Bomoni? Babengaki moto na etumbelo te, bomoni, likambo ya ndenge wana te.

⁷ Sikawa, etumbelo ezali esika ya kobondela, epai moto nyonso ayaka na losambo asengeli liboso kokende, kofukama na etumbelo, kobondela Nzambe na kimia pe kotalisa malombo ya mabondeli na ye mpo—mpo na balingami na ye, pe kotóndo Nzambe mpo na oyo basalaki mpo na ye, na sima azongi esika na ye.

⁸ Pe lisusu, losambo ezali esika oyo Liloba na Nzambe... “Kosambisama ebandaka na Ndako na Nzambe,” esika kosambisama ya Liloba esakolamaka. Na sima...Kasi lelo, to—tobongoli yango mingi mpenza.

⁹ Sikawa, nazali na likambo moko te kotelemela moto oyo abengaka bato na etumbelo, bomoni. Ezali...Ngai moko pe nasilá kosala yango mbala mingi, pe ntango mosusu nakosala yango lisusu mingi koleka soki nakobi na mosala. Kasi bobele mpo na ngai moko...Bomoni, bo—bo—bokongolaka mingi koleka. Pe eloko moko te kotelemela yango, mabe moko te na yango. Ezali malamau. Bomoni?

¹⁰ Mpo ete, boyoka, Yesu alobaki: “Moto moko akoki koya epai na Ngai te soki Tata na Ngai abendi ye liboso te. Pe baoyo nyonso Tata apésá Ngai bakoya epai na Ngai.” Ya solo. Na bongo, bomoni, bazali...Ebwaki libanda mpenza likambo na bino ya kobenga bato na etumbelo. Bomoni? Bomoni yango? “*Baoyo nyonso* Tata...” Bino...

¹¹ Mo—mokumba na biso ezali ya “koteya Liloba”. Biblia elobi: “Baoyo nyonso bandimaki bazuaki libatisi.” “Bóbongola mitema, pe bózua libatisi na Nkombo na Yesu Klisto mpo na bolimbisi, kolimbisama ya masumu.” Nini? “Bózua libatisi na Nkombo na Yesu Klisto mpo na bolimbisi ya masumu, bomoni, na sima, bokozua likabo ya Molimo Mosantu.”

¹² Kasi soki okómi kondimisa bato, na makasi, kobangisa bango, kondimisa bato na...Bato basengeli koya na makanisi malamau, na makasi te, na kondima bango moko, mpo na koyamba Klisto. Na sima, eloko ya liboso bakosala, bobele ntango bayambi Klisto, wana bafandi na ba—kíti na bango, eloko ekolanda ezali kobatisama na Nkombo na Yesu Klisto mpo na bolimbisi ya masumu oyo bandimi mpenza ete bakweisamaki na yango. Lolenge wana nde balimbisami na masumu na bango, bomoni. Mpo ete babongoli mitema; bazui libatisi mpo na kotalisa na bato ete “Nayambi Klisto lokola Mobikisi na ngai

moko”]; na ntango wana nde obelemi mpo na kozua Molimo Mosantu.

¹³ Pe, sikawa, bato mingi bazali kokoba, kondimisa bato pe kobenga bango na etumbelo, pe bongo na bongo ndenge wana, ezali malamau. Naboi yango te, na lolenge na ngai, ezali na yango malamau mpenza, mpo na moto nyonso oyo alingi kosala bongo. Kasi, mpo na ngai, ezunami na Makomi te, bomoni, na bongo, na—nalingi kokangama na Makomi.

¹⁴ Yango nde ntina napekisaki bande yango kobima, ezalaki mpo soki yango ebimaki, tolingaki koyamba mikanda nkama mitano na mposi moko mpo na koyanola mituna. Nyonso. . . Ezali komikotisa na mwa momesano ya moto moko, pe yango nde bosengeli kosala, na sima, bato nyonso bakobi kosala bongo.

¹⁵ Pe, mbala mingi, namonaka ete nalekisaka ndelo mwa mingi kotelemela makambo ya ndenge wana. Pe nalingaka mpenza kozala bongo te, kasi mbala mosusu misala nde ekomisaka yo ndenge wana, bomoni, e—ekokomisa yo kosála ndenge wana. Na bongo, nandimi solo ete bato bakososola yango.

¹⁶ Sikawa, tozongisi matondi mingi kozala naino na Tata na Lola ya boboto, Oyo—Oyo atalaka mabunga na biso te pe atángelaka biso yango te.

¹⁷ Nazalaki kotánga na Buku ya—ya Baroma, mokapo ya 4, esika Polo akomaki li—litatoli ya Nzambe mpo na bomoi ya Abraham. Sikawa, toyebi ete Abraham, mbala mingi, azalaki, tóloba, na mwa mobulu lokola biso. Kasi ntango ba. . . litatoli na ye ekomamaki, balobelaki mobulu na ye ata moke te, bomoni, balobeli yango ata moke te. Alobaki:

Abraham abetaki elaka na Nzambe ntembe te; kasi akómaki nde na nguya. . . apesaki Nzambe nkembo;

¹⁸ Bomoni, na lolende wana nde nakanisi ete oyo ya ngai pe ekokomama bongo Kuna, mabunga na ngai pe nyonso wana te, bobele makambo namekaka kosala, mposa ya motema na ngai ya kosalela libota na Nzambe.

¹⁹ Pe sikawa, toyei na ntongo ya lelo mpo—mpo na komeka koteya liteya moko moke awa, oyo, ntango mosusu, Nkolo atiaki na motema na biso mpo na kopesa na bato. Pe na kolikia ete ekosunga bino pe ekosunga ngai, mpo tozali elongo kobika na ntango moko ya nsomo, ntango ya suka. Na bongo, liboso na biso kobondela, nakosepela kotánga bisika mibale kati na Liloba; moko liboso ya libondeli, pe mosusu sima na libondeli. Ya liboso, mpo na kobanda losambo na biso na eteni na Yango oyo, nakosepela kotánga na Buku ya Baebele. Mokapo ya 11 ya Baebele, molongo ya ntuku misato. . . eteni 32, kobanda na, elobeli *kondima*.

Sikawa, nakoloba lisusu nini? to mpo ntango ekozanga ngai soki nalobeli Gedeon, . . . Barake, Samasona, . . . Yefeta; . . . Dawidi . . . Samuele, ná basakoli:

Oyo balongaki makonzi na nzela na kondima, basalaki boyengebene, bazuaki elaka, bakangaki monoko ya bankosi,

Basilisaki makasi ya móto, bakímaki mino ya mopanga, pe longwa na bolembu . . . bazuaki makasi, bakómaki bilombe na etumba, bakimisaki mopaya, mampinga ya bapaya.

Basi bazuaki bakufi na bango na lisekwa . . . bamosusu babetamaki makasi, mpo balingaki te ete moto ásikola bango; mpo bázua lisekwa oyo eleki malamamu:

Bamosusu bazuaki mimekano ya . . . kotirolama . . . kobetama fimbo, ee, koleka oyo wana, ya kokangama na minyololo . . . na babolóko:

Babomamaki na mabánga, bakatamaki biteni mibale na sii, bamekamaki, . . . babomamaki na mopanga: . . . bazalaki kotámbola balati mposho ya mpate pe ya ntaba; bazalaki kokelela, . . . pe konyokwama;

20 Bótala paranthèse oyo malamamu:

(Mokili ebongaki na bango te:) bazalaki kotelengana na bisobe, pe na bangomba, pe na madusú pe na mabulu ya mokili.

. . . bango nyonso, atako litatoli epesamaki mpo na bango na nzela na kondima, bazuaki eloko oyo elakamaki te:

Mpo Nzambe abombelaki biso eloko ya malamamu koleka, mpo bango babonga be te, kozanga biso.

21 Ntango natángaka masolo ya ba-sodá ya mpiko wana, namitunaka esika nini litatoli moke na biso ekozala liboso na bato yango, Mokolo wana.

22 Liboso ya kobondela, nani alingi tókanisela Nzambe likambo na ye? Tombola bobele loboko, pe bosenga nyonso ozali na yango, tika ete Ye ámona, áyoka pe ápesa yo yango sikawa, wana togumbi mitó na biso.

23 Tata na biso ya ngolu pe ya bolingo, tobelemi na komikitisa na Ngwende na Yo na ntongo oyo na Nkombo na Yesu, Mwana na Yo, mpo na kobondela mpo na biso moko pe mpo na bamosusu. Liboso, Nkolo, limbisa biso mabunga na biso nyonso pe masumu na biso ya nko. Na sima nde tokobondela mpo na bamosusu, Nkolo, mpo bango pe bálimbisama.

24 Pe Lingomba na Yo ekobeleva pene na Yo koleka. Mpo ya solo, Nkolo, na motema na biso, tondimi ete Obelemi mpo na kosala mosala elongo na Lingomba na Yo, obelemi mpo na

kobimisa Yango na mokili pe kokotisa yango na Bokonzi ya Nzambe. Kasi, Nkolo, sunga biso komilengela mpo na ngonga wana. Tika ete ntongo oyo ézala ntango oyo, Nkolo, kobanda na moto moko kino biso nyonso “Tolongola bozito pe masumu nyonso oyo ekangaka biso na pete, mpo tóyika mpiko wana tozali kopota mbangu na momekano oyo etiami liboso na biso.”

²⁵ Pe nabondeli, Tata na Likolo, lelo, ete Yo okobikisa babeli pe bato na mawa. Bato mingi bazali na mpasi na ekólo mobimba, ná malózi, ná “ba-microbes” ndenge minganga babengaka yango. Nabondeli ete ba-nguya na Yo ya kobikisa babeli, Nkolo, ézala na bango.

²⁶ Bongo, mpo na kokóma awa na losambo na biso ya moke na ntongo oyo. Bato mingi bayei na motuka na ntaka ya ba-kilométre nkama na nkama, balongwaki lobi na butu pe batambolaki butu-butu pe bakómi lelo na ntongo, pe batambolaki makasi mpo na kozua nzela ya kokóma na mongombo. Pe neige ezali kokweya na nzela mobimba. E Nzambe, tobondeli ete Ópambola bango libanda na momesano. Na ntembe te, bato mingi basengelaki kosalela eteni mingi ya mbongo ya bilei na bango ya mposo ekoya, to ya eloko mosusu, to makambo bakokaki kosalela na mbongo na bango, mpo na kosomba essence ná biloko mosusu, mpo na koya.

²⁷ E Nzambe, moto nani akoya epai na Yo maboko mpamba, akozonga na bofúluki. Yo nde olakaki yango. Pe nabondeli ete Ótondisa mitema na bango pe bikoló na bango (ya milimo na bango) meké na biloko malamau ya Nzambe kino bábima awa na móto ya “esengo elimbolamaka te pe kotondisama na Nkembo.” Tika ete ba-kópo ya bato malamau éfuluka na biloko ya molimo pe kitoko uta na Nzambe.

²⁸ Pambola loboko moko na moko, Oyebe bosenga oyo ezali sima ya loboko yango, Nkolo. Nasengi ete Ópambola bango libanda na momesano. Tomonaki Yo mposo eleki, lolenge Oyanolaki na libondeli, na ndenge ya bikamwa mpenza, mbala na mbala, na ntango ya maládi makasi, ya bokono pe ya bampasi. Ozalaka Nzambe, bisika nyonso, pembeni ya basali na Ye. Nabondeli, e Nzambe, ete Ózala pembeni na bango na ntongo ya lelo. Pesa bango mposa ya mitema na bango, Nkolo. Nandimi te ete ezalaki mpo na bango moko, na—na mposa mabe sima na yango. Nabondeli ete Ópambola bango.

²⁹ Sikawa, Tata, kanisa ngai lelo, mpo nákoka kozala na makoki ya komilongola na nzela . . . Bisu nyonso, kobanda na mokengeli kino na—na bana mike, tika ete tózala na makoki ya komitia pembeni, likolo na etumbelo ya Nzambe, mpo na kofungola mitema na biso, pe koyoka Molimo Mosantu ntango Akoloba na biso. Telemisa ba-mbeki na biso, na Yo mapamb- . . . mpo na koyamba mapamboli na Yo, wana minoko na yango etali likolo. Na sima, sopa nguya ya Mafuta ya epakweli kati na yango.

Pe pesa biso makasi, Nkolo, oyo esengeli na biso mpo na mikolo oyo ezali liboso na biso. Kokisa lipamboli oyo. Tosengi yango na Nkombo na Yesu. Amen.

³⁰ [Ndeko Branham apesi eyano epai na moto moko, oyo asololaki na ye mpo na kobenga na telephone—N.D.E.] Nayebi te. Zua bobele numero na ye ya telephone pe yebisa ye nakobenga ye sima na losambo. Nayebi te.

³¹ Bóbondela mpo na ngai. Ndeko Jack Moore azali kosolola na telephone, pe azali kokoba kosenga ngai kokende kuna na mposho oyo. Bomoni? Nazali mpenza komiyoka te. . . mpo na likambo yango, bomoni, bongo, nayebi likambo ya kosala te. Nalingaka Ndeko Jack. Likita monene ekosalema kuna pe ye aboi bato mingi, ndakisa Booth-Clibborn ná bato mosusu, koya. Bongo, atingami kaka, atii mayebisi na ye pe nyonso wana, alingi kaka ngai nákende. Na bongo, na—nalingaka komiyoka ete natindami mpenza kokende, bomoni. Pe ngai. . .

³² Pe, sikawa, wana tozali kozua lisusu Bakolinti ya Mibale, tokobanda na molongo ya 12 ya Bakolinti ya Mibale, pe tokotángá molongo moko ya Makomi lokola motó ya liteya, soki Nzambe akolinga bongo. Bakolinti ya Liboso, mo. . . To, nde, Bakolinti ya Mibale, mokapo ya 12, molongo ya 9. Nalingi kotángá nzela ya liboso. . . To, nzela ya mibale ya molongo ya 9, eteni na yango:

Kasi ye alobaki na ngai ete, Ngolu na ngai ekoki mpo na yo: mpamba te makasi na ngai ebongi be na kati ya bolembu. . .

³³ Botika ngai kotángá yango lisusu sikawa mpo bósosola motó ya liteya malamau:

Kasi ye alobaki na ngai ete, (ezali Nzambe kolobela Polo), Ngolu na ngai ekoki mpo na yo: mpamba te makasi na ngai ebongi be na kati ya bolembu. . .

³⁴ Na bongo, soki nakoki kobenga yango motó ya liteya, nakosepela kosalela oyo, makasi. . . *Makasi Ebongi Be Na Nzela Ya Bolembu Ebongi Be*. Soki tozali na bolembu, tozali na makasi. Ezali libanda ya momesano. . . na liyangani ya ba-Pantekotiste, koloba. . . kolobela *bolembu* lokola motó na liteya, mpo totatolaka ntango nyonso “tozali na makasi mingi”.

³⁵ Pe nalobaki liboso, ete, nakomeka bobele kobondela mpóso mobimba mpo na koyeba eloko nini ekozala malamau mpo na ngai koteya liboso na eyanganelo. Soki ezalaki bobele koya awa mpo bato báyoka ngai, nalingaki kosepela mingi mpenza koyoka moto mosusu kotelema awa na ntongo oyo.

³⁶ Ya solo mpenza, liboso na mikolo mibale to misato eleki, nazalaki na Kentucky elongo na bato ya Ndeko Gabehart kuna. Ntango natikaki esika na bango, ndeko molingami oyo ná mwasi pe bana na ye, ná bamosusu, wana nde likanisi oyo eyelaki ngai.

37 Nakotaki na ndako moko, ntango moke liboso na yango. Natelemaki libanda, pe mwasi yango alobaki: “Nalingi kosolola na motei wana.” Pe nakotaki na mwa ndako na bango. Ezalaki na . . . Alobaki: “Yo nde Ndeko Branham?”

Pe nalobaki: “Iyo madame.”

38 Alobaki: “Nazali mpenza na nsoni mpo na lolenge ya ndako na ngai,” alobaki, “ndenge nasengi yo kokóta.” Abandaki kolela. Alobaki: “Kasi na—nazali moenza na bosenga pe natielaka yo mpenza motema.”

39 Pe nasosolaki ete ezalaki esika Ndeko na biso ya mwasi Cox oyo tofandáká na ye elongo ku—kuna, mwa—mwa nkóko moko ya mwasi, oyo azalaka na magnetophone pe atambolaka na yango zinga-zinga mpo na koyokisa ba-bande. Ezali yango! Yango wana nde likanisi! Bomoni?

40 Natambwisaki miso na ndako yango, mwa ndako moko ya bongo, lokola esika nakolaki, kasi etutú etondaki na bilíli ya Klisto. Biblia ezalaki wana, likolo na mesa. Nalobaki: “Nakomikumisa lisusu ata moke te na bomoi na ngai, oyo nde lolenge ya ndako nakosepela kokota.” Asengaki libondeli mpo na moto moko. Pe ngonga mitano sima na ntango tobondelaki elongo, ngai ná mama nkóko ya mwasi wana tobondelaki elongo, Nzambe ayanolaki.

41 Bongo, tobondelaki lisusu, ngai ná Mama Cox ná bato oyo bazalaki zonga-zonga na mesa na ntongo wana, togumbaki mitó mpo tosengaki na Nzambe ete ápesa biso libaku ya kosala eloko moko na nzela ya makasi oyo ye asilaki kosala. Pe, wana tosengaki yango, Nzambe afungolaki nzela. Bomoni? Azali Nzambe!

42 Tolukaka komibómba sima na bolembu na biso. Tolingaka kotalisa boni tozali minene, boni tozali bato minene. Nakanisi yango ezali moko na makambo oyo ngai . . . Nzambe apesaki ngai liteya oyo, ezali mpo na kobimisa yango na makanisi na biso. Bomoni?

43 Ezali na makambo mike mike oyo tosalaka. Pe yango nde ntina toyaka na losambo, ezali mpo na komona esika mabunga na biso ezali, pe makambo tokoki kosala mpo na kokóma malamukoleka. Soki toyaka na losambo na ntina mosusu libanda na yango, nandimi te ete koya na losambo ekosunga biso mpenza. Tosengeli koya mpo na koyeba bolembu na biso, koyeba bisika mabe na biso pe . . . lolenge . . . komona boni tozali bato mike, mpo na kotia elikia na biso na Moto oyo azali na makasi. Kasi ntango tozali na bolembu . . .

44 Bato mingi kati na biso balingaka kotatola, to balingaka kokanisa ete tokokoka te pe, yango wana, tomibombaka sima na yango: “Ngai natángá te, nazali na makoki moko te, nakoki kosala likambo oyo te.” Soki ozali na makanisi ya boye pe ozali kosala bongo, kokóba kokende ndenge wana, okokoka pe

kosala eloko moko te. Kasi likambo moko oyo tozali kokima sima na yango, na bolembu na biso, Nzambe asalelaka likambo yango moko mpo na kosala na yango mosala. Bomoni? Azilaka biso kokóma na esika wana mpo Ákoka kosalela biso. To—tomibombaka sima mpo na koloba: “Ee, na—na—na—nazali. . . nakokoka kosala yango te, nakoki te. Na—nakokoka kosala yango te.” Pe Nzambe akozua eloko yango moko mpo na kosala mosala na yango. Ya solo.

⁴⁵ Yango nde ntina A—Aponi biso, mpo tozali na lolenge wana. Sikawa, ezali koyokana malamú te, kasi sima na ntango moke, tokokóma na ntina na yango, soki ezali mokano na Nzambe.

⁴⁶ To—tomoni, wana tozalaki kotánga, ete ba-bolembu pe koboyama. . .pe tomoni ete bato oyo bazalaka na bolembu koleka pe baoyo baboyamaka na bato ya mokili, bazali bilombe ya Nzambe, baoyo balóngaka na bitumba, esengeli na bato oyo bazali—bazali. . .oyo bamimonaka ete bakoki te.

⁴⁷ Ezalaki na ndeko moko Metodiste, bazalaki misato, baoyo bayaka na losambo oyo, kouta kuna na Ohio, to na nórdi ya Indiana. Balobaki na ngai, kala mingi te, balobaki: “Ndeko Branham,” balobaki, “touti kozua Molimo Mosantu, esengeli na biso sikawa koluka makabo mpo na mosala ya koteya?”

Nalobaki: “Bósala yango te! Bótika likambo yango.”

⁴⁸ Pe abalukaki pe atalaki ngai, alobaki: “Nauti kotánga buku ya ndeko moko oyo elobi na biso ete sima na kozua Molimo Mosantu, ‘tosengeli koluka makabo’, mpo yango ésalela Molimo Mosantu oyo.”

Nalobaki: “Mpo na kokóma na loléndo!” Bomoni?

⁴⁹ Soki botali malamú kati na Biblia, ezalaka ntango nyonso baoyo balukaka kokima yango, bango nde Nzambe asalelaka. Na ntango nyonso oyo moto azali. . .alingi kosala eloko moko pe akanisi ete azali mpenza na makoki esengeli mpo na kosala mosala yango, Nzambe akoki kosalela moto yango ata moke te. Bótala Mose, akimaki; bótala Polo, akimaki; pe bamosusu na bango, balukaki kokima yango.

⁵⁰ Nalobaki: “Bóluka eloko moko te. Soki Nzambe azali na eloko moko mpo na bino, Akopesa bino yango.” Bomoni? “Pe bótika Ye—bótika Ye kotalela likambo yango.” Nalobaki: “Boye, bokokóma na lolenge ya makambo tozali na yango, komona mikolo oyo, moto nyonso alingi kosala likambo *oyo* pe kosala *oyo kuna* mpo na kokóma moto monene. Bótala epai makambo yango ememi biso, bomoni?”

⁵¹ Na esika ya koluka kozala bato minene, tosengeli nde koluka—koluka kokóma moke. Bomoni? Bongo nde Nzambe akoki kosalela biso. Nazali na Makomi ebele ekomami awa, oyo nasengeli kolanda, nakanisi, kasi na. . .bisó. . .mbala mosusu nakozua ntango ya kosala yango te. Kasi tozali. . .

52 Bótala malamu ete esengeli kozala mo—moto na bolembu koleka pe oyo aboyami, pe pene na bilombe nyonso oyo Nzambe asila kotia na motó ya etumba azalaki moto ya ndenge wana. Moto oyo aboyamaki, moto oyo akanisaki ete akoki te, moto oyo azalaki ata na makoki moko te, moto wana nde azali na lolenge esengeli mpo na Nzambe kokoka kobanda kosalela ye. Ya solo. Ezali ntango oyo bakanisi ete bakoki te, bazali na eloko moko te, ezali ntango wana nde Nzambe akoki kozua bango na maboko mpo na kosala na bango likambo. Bomoni? Ntango. . . Kasi ntango tokanisi ete tozali na makoki ya kosala yango, ntango wana Nzambe akoki kosalela biso te mpo tolingi kosala yango na mposa na biso moko.

53 Pe, bongo, na ngámbo mosusu, tozalaka na lolenge wana pe tokanisaka ete tokoki te, pe toboi kosala yango; kasi, na bongo, soki toyoki mbela na Nzambe, yango mpenza nde likambo Nzambe alingi kokótisa biso na yango, likambo ya lolenge wana, mpo Ákoka kosala.

54 Ntango biso moko tokoki te, ntango wana nde tokoki komipesa na Molimo ya Nzambe. Ntango nyonso biso tokanisi ete tokoki kosala yango, ntango wana tokoki kosala yango te. Kasi soki tokómi na esika oyo toyebi tokoki kosala yango te, ntango wana nde tokomipesa na Nzambe pe Akosala yango. Na bongo, soki biso nde tozali koluka kosala yango, tokokweya, kasi soki tomipesi mpenza na Nzambe, Nzambe akoki kokweya te. Ezali na eloko bobele moko, oyo Nzambe akoki kosala te, ezali kokweya. Akoki kosala makambo mosusu nyonso, longola bobele kokweya. Kasi Akoki kokweya te.

55 Boye, ntango nyonso tozali komeka biso moko pe kotalela makoki na biso moko, pe bongo na bongo, ee, tokosala eloko moko te. Kasi soki tokómi esika oyo toyebi ete tozali mpamba, ntango wana nde Nzambe akoki kosalela biso.

56 Eloko ya motuya, moko na makambo ya motuya oyo tosengeli kolonga. . . Sikawa, bómikanisela likambo oyo, koleka mingi bino bilenge batei, ná bandimi pe lokola. Ezali na eloko moko tosengeli kolonga, soki tolingi kokokisa mposa ya Nzambe na bomoi na biso, ezali ete, tosengeli kolonga likanisi ya *makoki ya bato*. Soki tokoki kokóma esika oyo tokanisaka ete tokoki kosala likambo na mayele na biso moko pe na makoki na biso moko, tosengeli kolonga likambo yango na lolenge oyo tokoki kotika yango pe kotia yango pembeni mpo Nzambe ákoka kosalela biso. Ya solo.

57 Pe komípesá mobimba! Tokoki kosalela ata makoki moko te. Tosengeli komipesa mobimba! Pe, mpo na kobeleva na Nzambe, bosengeli kopesa Ye bomoto ya kati, nzoto pe molimo. Nyonso yo ozali esengeli kopesama na Nzambe, mpo Ákoka kokokisa mokano na Ye kati na yo pe kati na ngai.

58 Sikawa, ezali matata, nayebi, mpo tolingaka ntango nyonso kokotisa eteni na biso moko na kati, eloko oyo *toyebi*, toyebi ete tolingaka kosala bongo. Tolobaka: “Ee, na—nayebi ete esengelaki kosalema boye.” Kasi ntango nyonso oyo ozali kosala yango bongo, ekosimba te, pe Nzambe akosalela makasi wana ata moke te. Ntango mosusu (na lisungi ya Nkolo) tokolobela yango sima na ntango moke, mpo na kotalisa bino ete Nzambe akoki kosalela makoki na bino te.

59 Pe yango nde likambo ya mokili oyo lelo: makambo bato babikeli na ba-seminaire eleki mingi, motuya mingi koleka epesami na kelasi, motuya mingi koleka etiami na bondeko to na boyokani kati na ebongiseli, tozali kotia elikia bamoko na bamosusu, tozali kotia elikia likolo na bato bazali na makoki.

60 Biblia elobi: “Ndenge nini bokoki kozala na kondima wana bozali . . .” Tótala, Likomi yango elobi nini? “Ndenge nini bokoki kozala na kondima wana bozali kopona-pona kati na bino?”

61 Ntango tozelaka, tolobaka: “Moto oyo, azali moto monene. Oyo azali moto monene, nakotalela bobele ye,” esepelisaka Nzambe te ntango bosalaka bongo. Tosengeli kotalela Nzambe pe Nzambe Ye moko! Tosengeli ata moke te kotia motema na makoki na biso moko to ya moto moko. Tosengeli komitika mobimba na Nzambe.

62 Makoki ata moko te, ata ya moto moko te, Nzambe akosalela yango ata moke te. Nzambe asengeli kobimisa makoki na biso nyonso liboso na Ye kokokisa mokano na Ye. Soki Azali na mosala ya kosala mpo na biso, ntango nyonso oyo tokomimona ete tozali kosala mosala malam mpenza, bongo, Nzambe akoki kosalela biso ata moke te.

63 Sikawa, bokoloba: “Wana, olobi likambo moko makasi mpenza, Ndeko Branham.” E—ezali likambo moko makasi, kasi botala zinga-zinga mpo na koyeba soki ezali solo to te.

64 Botala zinga-zinga lelo misala nyonso minene na biso, oyo tokanisaka ete tosáláki, bongo wapi Boklisto na Etats-Unis? Botálá mangomba ná bibongiseli na biso nyonso, pe ba-evangeliste na biso pe mayanganisi ya lobiko na nzoto, ná makambo mosusu nyonso oyo tozalaki na yango, kasi ekómi wapi? Mabe koleka ndenge ezalaki na ebandeli! Ekómi mabe mingi lelo koleka ndenge ezalaki, mpo tomekaki kosala yango na makoki ya bato.

65 Basanganaka elongo, babóndelaka ntango molai pe bayáka awa. Pe mokolo mosusu bazalaki mingi mpenza kuna, nkóto mokama na ntuku mitano, to pene na yango, basanganaki elongo, ba-Protestant ná ba-Katoliko; babondelaki, basalaki mwa mabondeli, bapesaki mwa mabondeli pe bongo na bongo. Ekokaki kozala malam mpenza kosangana bango te, ezalaki ata na litomba moko te na miso ya Nzambe.

66 Sikawa, soki nalobi mabe, bólimbisa ngai. Bomoni? Kasi na—na. . . Osengeli kofandisa likambo yango malamumu. Bomoni? Osengeli kobeta sete makasi.

67 Bongo, esungaki na nini? Na eloko te. Pe ekosunga ata moke te kino moto nyonso oyo amibengaka Moklisto akobosana makoki na ye moko mpo na komitika na Nzambe.

68 Na ntango wana nde Nzambe akoki kokokisa mwango na Ye pe kotinda. . . kolamuka te, kasi, ndeko, eloko ya liboso Asengeli kosala ezali kotinda kufa, ya solo, mpo *tókoka* kozua lisusu bomoi. Osengeli kokufa liboso ya kobotama mbala mibale, pe osengeli. . . Asengi kokufa ya biso moko. Losambo oyo esengeli na kokufa, ná ngai pe lokola. Bisu nyonso, tosengeli na—na kufa mpo *tókoka* kolamuka na bomoi ya sika, etemelo ya sika, elikia ya sika, lobiko ya sika! Tosengeli liboso na mokolo ya matángá.

69 Tosengeli kokoma na esika ya komitika na Molimo, esika ya kotalela mingi kelasi, manaka na biso, pe biso. . . ba-campagnes na biso pe nyonso oyo tozali na yango. To—to—totalelaka boyokani ná batei mingi ya ndenge na ndenge oyo toyokanaka na bango. Topesaka nzela na makambo mingi. . . “Soki tokoki kozua bango mingi te, ee, tokokoka te. Soki tozangi yango, tokokoka kokende na bingumba te.” Na bongo, ntango tosali bongo, tozali kokómisa yango masíni monene mpenza oyo ezali na carbone kati na yango, bomoni.

70 Na bongo, to—tosengeli kozala mosika na yango, na makoki wana ya bato. Tosengeli kokóma na esika oyo tokoki kopesa milimo pe bomoi na biso, ata ozali mwasi ya ndako, mosali bilanga, mobongisi motuka, to moto nani, tosengeli komipesa mobimba na Nzambe pe koyeba ete “tozali bato mpamba.” Bongo, Nzambe akobanda wana. Na sima Akobanda kosala mosala. Bisu nyonso tozali na kati, moto nyonso. Yango nde e—eloko tosengeli kosala.

71 Histoire etalisi polele, sikawa mpenza, etalisi polele (histoire) ete Nzambe aponaka ntango nyonso bato mpamba mpo na kokómisa bango bato na Ye. Nzambe azuaka bato oyo bazali mpamba.

72 Lelo oyo, soki otángá likindo malamumu te, komeka na yo kopusana pembeni na engumba te, komeka na yo kopusana ata pembeni na liyangani moko te. Kasi soki otángá mingi, ná bakelasi ya minene pe nyonso wana sima na yo, okoki kokende na engumba nyonso pe bakoyokana na yo, okozala na liyangani ya monene. Ee, ezali likambo ya liyangani te. . . Ezali liyangani, lokola mayangani nyonso, kasi ekosunga na nini? Bomoni, bino—bino lisusu. . . Bokobelemisa bana basi pe bana mibali kuna, bazali—bazali kolia bazoká ntango bazali kokende na etumbelo, basi ná mibali bakendeke kuna bobele mpo na koloba ete “bakendeke na etumbelo”, bakokota bisika ya kozua malako,

bakobima mpo na kobwakiselama mai to kozindisama na mai, to ndenge nini, pe—pe mobu moko na sima . . .

⁷³ Moko na ba-evangeliste na biso ya monene koleka alobaki, soki akokaki koyeba ete akoki kobikisa bandimi na ye zomi likolo na mokama na mobu moko, alingaki kosepela. Ntango, na bongo, soki azalaki na bandimi nkoto moko, na mobu ekolanda basengelaki kokóma nkóto zomi. Bomoni, tozali kobima na nzela; tozali kokende pembeni.

⁷⁴ Bamosusu kati na biso batongaka yango likolo na mayele ya bongó: “Oh,” ete, “moto oyo, ayebi nyonso, atángá mingi mpenza. Tosengeli kotángisa bato na biso pe kotinda bango na kelasi.”

⁷⁵ Baoyo mosusu batiaka mobóko likolo na kongilima ya—ya koningana, kolénga, kolela, kogánga, kobina na Molimo, to eloko mosusu, eloko moko ya kotúntuka ya libanda. Yango pe ezali mabe, lokola koyekola! Soki zabolo akoki kozua yo na ngámbo oyo te, akopusa yo na ngámbo oyo *kuna*.

⁷⁶ Kasi likambo mpenza ezali, kozala na eloko moko te oyo okoki komitalela, to, eloko oyo okoki kosala, bobele komitika mobimba, kotika ba-bolembu na yo nyonso Nzambe, pe koloba: “Ngai oyo.” Kozala na eloko moko te, na likoki moko te oyo okoki kotielala motema!

⁷⁷ Luká-luká kati na Makomi mpo na koyeba, ndenge nazali na biteni ya Makomi nakomaki awa, mpo na kotalela. Kati na Makomi yango, tomoni, ete Nzambe asalelaka ntango nyonso bato mpamba mpo na kokómisa bango bato na Ye. Azuaka ntango nyonso baoyo baboyami na mokili, baoyo baboyami na eleko na bango, pe lolenge ya bato wana nde Ye alokotaka mpo na kosalela.

⁷⁸ Bótala ba—bantóma. Bókanisa Petelo, molóbi mbisi, atángaki mpenza te mpo na koyeba kokoma nkombo na ye moko. Yoane, atángá te, moyínga. Bato wana! Atikaki pembeni bato minene, banganzambe oyo batángá pe bato ya lokumu ya bileko wana, bato ya mayele mingi, bandimi ya lingomba, kasi atikaki . . . baoyo bazalaki komimona bato minene, pe Alokotaki baoyo bazalaki bato mpamba pe asalelaki bango.

⁷⁹ Sikawa, moto monene akoki kokóma moko na bato na Ye, Nzambe akoki kosalela ye soki akoki kobosana ete azali moto monene. Soki obelemi mpo na kobosana ete ozali *moto monene* pe okómi *moto mpamba*, na ntango wana Nzambe akoki kosalela yo pe kokómisa yo moto monene. Bomoni? Kasi osengeli kobosana ete ozali na motuya monene.

⁸⁰ Bato mingi kati na biso, mingi kati na biso tosalaka bongo na bomoi na—na biso. Bobele ntango. . . Bato mosusu, bobele ntango bakómi Baklisto, bakómaka na loléndo, na bokesene, ya solo, bazali kolanda nzela oyo esengeli te. Bazali kozonga sima esika ya kokende liboso. Ntango. . . Koleka ozali komilongola, koleka pe ozali kotikela Molimo Mosantu nzela ya kokota.

⁸¹ Ndenge Elisa ayebisaki Yosafata ná bamosusu, alobaki: “Bótímola mabúlu mingi awa. Koleka bokotímola na bozindo, koleka pe esika ekotikala mingi mpo na mai.” Pe koleka tokobwaka libanda makambo na biso moko, bo—bosoto na biso moko ya makoki na biso moko, koleka pe esika ekotikala monene mpo na kotondisama na Molimo ya Nzambe; ntango nyonso oyo tokokoka kosala bongo.

⁸² Polo, oyo touti kotánga makambo na ye awa na—na Bakolinti, na Bakolinti ya Mibale, tomoni ete moto yango azalaki moto monene. Azalaki moto ya mayele mingi, moto monene. Kasi asengelaki kobosana makambo nyonso ye ayebáká, mpo na koyeba Klisto.

⁸³ Nakotika . . . nakotánga moko na biteni ya Makomi oyo awa, soki bo—bolingi kotánga yango elongo na ngai. Tózua, mwa moke, Bakolinti ya Liboso, mokapo ya 2 na molongo ya 1. Pe tótánga awa, mwa moke, likambo Polo alobaki, ye moto monene pe ya mayele mingi oyo, likambo alobaki mpo na ye moko, eloko asengelaki kosala. Bakolinti ya Liboso, mo—mokapo ya 2 ya Bakolinti ya Liboso, pe tóbanda na molongo ya 1. Bóyoka moto ya mayele mingi oyo.

⁸⁴ Moto oyo atángaki mingi. Azalaki na makoki ya koloba pene na nkóta nyonso oyo ezalaki kolobama na mokili. Asengelaki komikumisa mpo na yango. Abókolamaki na lingomba ya makambo makasi ya Bafalisayi, pe tata na ye azalaki Mofalisayi. Na sima, akómaki “Mofalisayi ya Bafalisayi”, elingi koloba ete azalaki—azalaki mpenza moto ya ma—makambo makasi koleka Bafalisayi. Azalaki moto monene. Azalaki na bokonzi, pe azalaki moto ya mayele.

⁸⁵ Tata na ye atángisaki ye na kelasi ya molakisi malamumu koleka, oyo azalaki na ekólo mobimba, Gamaliele, na eleko wana, azalaki molakisi ya monene koleka na biteyelo mosusu. Polo pe akómaki moto ya lolenge wana. Ayekolaki nkóta nyonso. Ayekolaki psychologie. Ayekolaki makambo nyonso ya ndenge na ndenge oyo ezali na—na kati ya . . . oyo bayekolaka lolenge wana. Pe azuaki lisungi monene kouta na—na lingomba ya banganzambe pe ba—bato minene. Pe alingaki kokende konyokola mpenza Lingomba.

⁸⁶ Bóyoka moto yango mpenza, ná mayele na ye nyonso, sima na ye kondimela Klisto. Bóyoka makambo alobaki. Esengelaki na ye kobosana bini azalaki makasi pe monene. Asengelaki kososola ete akokaki komitalela te. Asengelaki kososola ete koyekola na ye ezalaki eloko mpamba. Asengelaki kososola ete koyekolisama nyonso azalaki na yango, asengelaki kobosana makambo nyonso oyo ayekolisamaki na yango. Bóyoka ye sikawa.

. . . ngai, bandeko, ntango nayaki epai na bino, . . . na elobeli ya kokamwisa te . . . ya bwanya, bomoni, mpo na kosakwela bino litatoli na Nzambe.

Nayaki epai na bino te mpo na koyebisa bino: “Sikawa, Ngai nde Molakisi Saulo ya Eteyelo *Sóngóló*, nazali . . . ya lingomba monene na ebongiseli oyo.” Nayaki epai na bino ndenge wana te.

Mpo nazui ekateli ya koyeba eloko moko te na kati na bino, longola bobele Yesu Klisto, ye oyo abakamaki na ekulusu.

87 Wana, boyoki litatoli ya moto ya ndenge wana.

Nazui ekateli ya koyeba eloko moko te na ntina na makoki na bino. Nayebi ete eloko moko te ezali kati na bino pe nazui bobele ekateli ya koyeba bobele eloko moko oyo namoni kati na bino, ezali Yesu Klisto, Ye oyo abakamaki na ekulusu. Mobikisi oyo abakamaki na ekulusu kati na bino, nakondima bobele yango.

88 Bóyoka ye.

Pe nayaki epai na bino na . . . (bonene? Na nini?) . . . bolembu, pe na kobanga, pe . . . kolénga makasi.

89 Bokoki kondima ete moto oyo, Mofalisayi ya Bafalisayi, molakisi ya balakisi, moto oyo ayekolaki, kobandá bomwana (mpo na mosala ya koteya) mpo na kozala moto ya elobeli malam, moto na mayele mingi mpenza, koya liboso ya bato lokola Bakolinti koloba: “Nayaki epai na bino na bolembu, na kobanga pe na kolénga makasi”? Moto oyo aningisaki mokili, missionnaire monene koleka oyo ayebanaki, kotatola ete “ayaki na bolembu”, lokola moto ya mayele oyo atángá mingi te, kasi “na bolembu pe na kobanga”, mpo na koboya kobima na Nzela esika moko. “Na kolenga makasi”, mpo akokaki kotalela makoki na ye moko te.

90 Ntina oyo azalaki “kobanga”, ezali te mpo azalaki kobanga eloko moko, kasi azalaki kobanga kozanga kosepelisa Nzambe na lolenge moko, ete ásangisa makoki na ye moko kati na Yango; eloko moko oyo ayekolaki, oyo ye . . . Azalaki koyebisa bango ete: “Nayaki epai na bino na elobeli ya kokamwisa te (nayaki epai na bino na *kobanga* ete nábima ndenge wana), kasi nayaki epai na bino na koyeba eloko mosusu te, bobele Klisto, Ye oyo abakamaki na ekulusu.”

Pe nayaki epai na bino na kobanga, na bolembu, pe na kolénga makasi.

Pe elobeli na ngai pe mateya na ngai ezalaki na maloba na kondimisa ya bwanya ya bato te, kasi na misala oyo ezali kotalisa Molimo pe . . . nguya:

91 Bóyoka moto oyo azalaki mobundi ndenge amilongolaki ye moko. Amen! Soki ezali na eloko moko biteyelo na biso esengeli kosala lelo, soki ezali na eloko moko mangomba na biso esengeli na yango lelo, ezali kolongola makambo nyonso kati na yango, makanisi na bino moko pe makoki na bino moko. Bólongola makambo nyonso wana kati na bino liboso na Nzambe, soki te bokobanda kosala makambo na bino moko.

⁹² Nabanzi ete bino . . . ete likambo yango ekoti na bozindo kati na biso, ézala awa, ná baoyo bazali koyoka bande na mokili, bozali kososola ete bosengeli kokóma bato mpamba. Moto-oyo-ayebi-nyonso te, moto monene te, kasi *moto mpamba*. Zalá . . . osengeli kokóma putulú. Osengeli kokóma esika oyo oyebi ete ozali eloko mpamba. Pe komata likolo na yango ata moke te, mpo bobele ntango oyo omati likolo koleka yango, omati likolo koleka Nzambe. Osengeli komitika kati na putulú pe na nzela ya Damaséke. Esengeli na yo kokita likolo na mpunda. Ezali mpo na bisika nyonso, mpo na baoyo bazali awa ná baoyo bazali koyoka bande na mokili.

⁹³ “Elobeli na ngai,” alobaki, “ezali te . . . na maloba ya kokamwisa ya bato pe bwanya ya bato, kasi na misala Molimo ya nguya ezali kotalisa.”

⁹⁴ Sikawa, bótala malamú! “Mpo na nini, Polo? Mpo na nini osali boye?”

Nguya! *Mpo kondima na bino éuta na bwanya ya bato te, kasi na nguya ya Nzambe.*

⁹⁵ Oh, oyo nde motei! Moto monene oyo . . . Alukaki Nzambe, pe alobaki: “E Nzambe, nazali na bolembu, pe na—nayebi te eloko ya kosala. Nabondeli Yo, e Nzambe, pesa ngai makasi, longola bozangi na ngai, ná makambo oyo, mpo nákóma na makasi mingi.”

⁹⁶ Nzambe ayanolaki ye, koloba: “Polo, makasi na Ngai ebongi be kati na bolembu na yo.”

⁹⁷ Bongo, Polo alobaki: “Ntango nazali na bolembu nde nazali na makasi. Iyo!” Alobaki: “Na bongo . . . Nakomikumisa na bozangi na ngai, na bolembu na ngai pe bongo na bongo. Nazali kotondo Nzambe mpo makambo nyonso wana esili kobima kati na ngai. Ntango yango nyonso wana ebimi kati na ngai, nde Nzambe akoki kokota. Kasi ntango nyonso oyo mwa makoki na ngai moko ezali na kati, Nzambe akoki kokota te.”

⁹⁸ Ezali yango mpenza, to—tokangeli Ye ekuke libanda. Tobangani Ye biso . . . Kobanda na mobóla ya suka kati na biso kino na mozui ya liboso kati na biso, kobanda na moto moke koleka kino na moto monene koleka, totiki Nzambe libanda na bomoi na biso mpo na makambo na biso moko.

⁹⁹ Nalobaka mingi: “Monguna na ngai monene koleka, ezali William Branham.” Ye moto akangelaka Nzambe nzela. Ye moto akómaka goi-goi. Ye moto akómaka, mbala mosusu, esika oyo akanisaka ete akoki kosala likambo, pe ntango asalaka bongo, elongolaka Nzambe na mobimba. Kasi soki nakoki kolongola moto yango, soki nakoki kokóma esika oyo ye alongwe na nzela, na ntango wana Nzambe akoki koya kosala makambo oyo William Branham ayebi ata moke te.

¹⁰⁰ Na ntango wana nde Nzambe akoki kosalela yo. Na ntango wana nde Akoki kosalela moto nyonso kati na bino. Akoki kosalela moto nyonso ntango tolongwe na nzela. Kasi ntango nyonso oyo tokomitia na nzela, ntango wana tokokoka te. Malamu.

¹⁰¹ Sikawa, tomoni ete moto monene oyo, Polo, azalaki—azalaki mwana mokonzi kati na batei. Bibongiseli nyonso ezalaki komemia ye. Moto yango akokaki kokende na engumba moko mpo na kosala mayangani bisika nyonso. Mpo na nini? Azalaki na mikanda ya ndingisa. Ee, azalaki moto monene mingi, pe azuaki mpenza mokano ya konyata bato nyonso bazalaki na bolembu, kino azuaki nguya kouta na nganganzambe mokonzi, mokonzi ya likolo koleka, mpo na kokanga Baklisto nyonso wana. Nguya ya politiki, kouta na lingomba na bango mpo na kokanga bango nyonso! Oh, azalaki makasi! Akokaki kokanga Baklisto pe kobwaka bango na boloko mpo bayokanaki na ye te na malakisi na ye ya likindo, na malakisi ya Bafalisayi pe Basadukayi. Azalaki kokanga Baklisto.

¹⁰² Kasi, bótala, asengelaki kokóma mokangami, ye moko, mpo ákoka kobungisa yango, ákoka kobungisa makasi pe bokonzi na ye. Akómaki mokangami, ye moko, mpo na kobungisa nguya ya kokanga oyo azalaki na yango. Asengelaki kobungisa oyo ye azalaki, mpo na kokóma mokangami.

¹⁰³ Nzambe atikaka bato minene! Atikaki banganganzambe. Atikaki bato oyo bazalaki na lolendo. Pe Aponaki Polo, moto monene oyo, pe akweisaki ye na putulú ya mabelé mpo na kosala makambo ye. . .lokola baoyo mosusu bazalaki kosala. Asalaki ete básala. . .Asalisaki ye makambo lokola bato ye azalaki kokanga. Akangaki Polo na Molimo ya Nzambe, mpo na kosikola ye na nguya oyo azalaki na yango ya kokanga Baklisto. Okoyebisa ngai ete Nzambe ayebi eloko Azali kosala te? Alongolaki makasi na ye mpo na kokangola ekanganeli na—na ye.

¹⁰⁴ Batei boni Nzambe akoki kosalela na ntongo oyo soki bakokaki bobele kotika Nzambe kokanga bango na Liloba na Ye pe nguya na Ye, pe kokangola bango na makasi ya bibongiseli pe mangomba wana! Bato boni ya bosembo bazali na engumba oyo, na ntongo ya lelo, baoyo bakendeke na mangomba ya bibongiseli minene oyo, bato boni Akoki kotondisa na Molimo Mosantu, mpo na kopelisa móto na ekólo oyo, na Nsango Malamu pe na nguya, soki bakoki bobele kozua pe komikangola na nguya bazali na yango mpo na kokangama na Molimo Mosantu, mpo na kokóma lokola Polo, moombo ya bolingo mpo na Nzambe!

¹⁰⁵ Nzambe azuaki Polo pe akómisaki ye moombo, Akangisaki ye na Ye moko pe Atindaki ye epai na mabota oyo azalaki koyina. Kasi, bomoni, asengelaki kokangolama na nguya na ye ya mangomba, mpo na kokangama na nguya na Nzambe.

Asengelaki kobungisa makasi na ye pe kokóma na bolembu pe moto mpamba, mpo na kozua makasi ya Nzambe, mpo na kokangama na Nzambe, mpo na kosala makambo Nzambe akoyebisa ye kosala.

¹⁰⁶ Yango nde tosengeli kosala lelo. Yango nde nasengeli na yango. Yango nde moto nyonso asengeli na yango, ezali komibungisa, kobungisa makoki na ye, kobungisa oyo ye azali, mpo na kokoka komipesa mobimba na Molimo Mosantu. Mwasi ya ndako asengeli na yango. Mwana ya kelasi asengeli na yango. Tozui . . . ata bana na biso.

¹⁰⁷ Nazali kokanisa mwana mobali moko, lobi sima na nzanga to lobi oyo kuna, to mokolo moko, akendeki koyebisa yaya na ye ya mwasi ete ásalela ye makambo ya kelasi noki-noki, abimaki pe ayebisaki bilenge mibali mike, alobaki: “Fiuu! Makambo yango ezalaki makasi te.” Bomoni, balakisamaki, tóloba, kozanga bosolo.

¹⁰⁸ Elingaki kozala malamú koleka . . . Pe bato yango bazali makonzi na mangomba. Ekozala malamú koleka ete Papa, na ntongo, na ntango ya bilei ya ntongo, áloba: “John akosala momékano na ye lelo. E Nzambe, zalá na John! Sungá John! Asengaki ngai na ndako ya kolala na ntongo oyo, alobaki: ‘Papa, bondela mpo na ngai lelo, mpo nakosala komekama na ngai. Bondela mpo na ngai.’”

¹⁰⁹ Nakosépela koleka mwana na ngai ya mobali ázua “0” ya bo—bosembo na lokasa na ye, álonga te, esika ya kosépela mpo nayebi ete azui “10” na kozanga bosolo. Iyo, misie! Eloko tosengeli na yango ezali komibungisa, kotalela na mobimba nguya ya Nzambe.

¹¹⁰ Sikawa, “kokangama”. Nzambe atikaka bato minene pe akamataka bato na bolembu. Nzambe atikaka baoyo bakanisaka ete bazali na motuya, mpo na kozua moto oyo ayebi eloko te mpo na kokokisa mwango na Ye na bomoi na bango. Yango nde tomonaka.

¹¹¹ Nzambe alobaki na Polo: “Makasi na Ngai ebongi be na bolembu na yo. Ma—makasi na Ngai ebongaka be koleka wana ozali kokóma na bolembu koleka. Koleka yo okomipesa na Ngai, koleka Ngai pe nakosalela yo. Koleka yo okobosana koyekola na yo, koleka yo okobosana ebongiseli na yo, koleka yo okobosana makambo na yo mpo na komipesa na Ngai, koleka Ngai pe nakosalela yo. Lokola yo okómi na bolembu, Ngai nako—Ngai nakokomisa mwango na Ngai makasi.”

¹¹² Nzambe akoki kopesa makasi longwa na bolembu! Yango nde ntina Asalaka bongo ntango nyonso. Ntango Aponaki bayekoli na Ye, nani akanisaki . . .

¹¹³ Komikitisa ya Mwana na Ye moko ntango Abotamaki na elielo ya ba-nyama, na ndako ya bosoto, ndako ya ngombe, pe azingamaki na bilamba ya bosoto! Bomoni, Akokaki koya na

ndako monene ya kitoko. Akokaki kokita na ba-nzela ya Lola, pe nyonso. . . wana Banje bazali kopesa ye saluti. Kasi Aponaki kokomisa Klisto ndakisa na biso, mpo na biso, pe Abókolaki Ye na komikitisa.

¹¹⁴ Atángisaki Ye na biteyelo ya mokili oyo ata moke te, kasi Atángisaki Ye na nguya na Ye Moko, ya. . . mpo Ákoka Ye moko komipesa mobimba, na makanisi ya bato to na makasi ya mokili te, kasi Ámipesa mobimba na nguya ya Nzambe.

¹¹⁵ Pe yango nde ezali kosalema na biso, lelo tozali komipesa na bibongiseli pe makambo minene na biso. Tozali komipesa koleka na makambo ebongiseli ezali koloba, na makambo *bango* bazali kolobela. Kasi ekesani na mokano ya Nzambe. Tosengeli komipesa na Molimo ya Nzambe pe kokende esika Molimo alobi kokende. Ya solo.

¹¹⁶ Baebele ya Nzambe oyo touti. . . basodá ya Nzambe, tó pe, “bilombe”. Touti kotánga na Buku ya Baebele, mokapo ya 11 pe molongo ya 34.

. . . *longwa na ba-bolembu, bazuaki makasi, . . .*

¹¹⁷ Basengelaki kozala na bolembu liboso na bango kozua makasi. Longwa na ba-bolembu na bango, bazuaki makasi. Bino baoyo bozali kokoma Makomi, kuna, Baebele 11:34. Malamu.

¹¹⁸ Bótala eloko ekoki kobondisa biso. Bótala eloko ekoki kopesa biso mpiko. Longwa na bolembu pe komikitisa Nzambe aponaka bato mpo na kotonga Bokonzi na Ye longwa na bango. Ekokóma biso na Lola, ntango tokozala Liboso na Nzambe ná Lingomba na Ye, tokozala kati na ebele na bato oyo bazalaki na bolembu pe baboyamaki pe baoyo mokili ebwakaki libanda, pe bato-bayebi-eloko-te.

¹¹⁹ Ezali kokamwisa te ete Nzambe akokanisaki biso na bampate? Mpate ezali nyama oyo ezangi mpenza komisunga. Ezali na eloko moko te oyo ezangi mpenza komibundela lokola mpate. Lapin ekoki kokima; esénde ekoki komata na nzete; mbwa ekoki koswa; nkosi ekoki kopasola; mpunda ekoki kobeta moto lokolo; ndeke ekoki kopumbwa; kasi mpate eyebi komisunga mpenza te.

¹²⁰ Pe lolenge wana nde Nzambe alingi biso kozala. Koyeba ete tokoki te na makambo nyonso, bongo nde Nzambe akozua moto yango pe Akobanda komipesa lolenge kati na moto yango; kosalisa maboko na ye kosala makambo oyo Nzambe alingi maboko kosala, kosalisa bibebu na ye koloba makambo oyo bibebu na Nzambe ekoloba; mpo ezali ya ye te, ekómi ya Nzambe. Abandi kotonga ezaleli, abandi kozua bolembu yango mpo na kosala makambo na Ye Moko.

¹²¹ Amemi biso awa na mokili, mpo na sima. . . Totángá, tozali na mayele mingi. Bosílá komona bakitani, mabota? Soki tozui, ndakisa, lokola Abele, longwa na Abele, Seti abimaki; libota ya Seti ekobaki, kino na ntango ya Nowa, bango nyonso bazalaki

bato ya komikitisa, basali bilanga. Kasi bana ya Kaina bakómaki na mayele mingi, mayele mabe, batángá, bato minene, batongi bandako, bato bayebi mosala.

¹²² Kasi na ngámbo ya Nzambe bazalaki na bolembu pe na komikitisa. Na lolenge wana nde Nzambe asalelaki bango. Yango nde lolenge ya kosala ya Nzambe. Yango nde lolenge Nzambe abelemaka na biso, ezali ntango tozalaka na bolembu. Ntango wana nde tozuaka eloko moko. Likambo oyo epesaka mpiko, ya solo, mpo Bokonzi mobimba ya Nzambe etongami na bato ya lolenge oyo. Na bongo, soki okómi na lolenge wana, na ntango wana, o—okoki. . . ozali kati na Bokonzi na Ye.

¹²³ Likambo na biso ezali ete. . . ezali te ete tozali na bolembu mingi, likambo ezali ete tozali na makasi mingi. Tozali—tozali—tozali mpenza na makasi mingi. Esili. Likambo ezali ete tozali na motó makasi mingi. Ya solo, tozali na makasi mingi na mitó na biso. Toyebi mingi koleka. Nzambe alingi kobimisa yango kati na biso. Ya solo. Tozali na makasi mingi, tozali na makasi mingi mpo na komipesa na Ye. Tozali na. . . To—tomipesaka na biso moko. Tokanisaka: “Ee, sikawa, yoka, na—nayebi malamumu mpenza likambo nazali kosala!”

¹²⁴ Nakamwaki mingi, eleki mwa ba-mpokwa, ntango mama azalaki kobela, na lopitalo. Nakendeki na. . . Mwasi moko azalaki na ekuke elandi. . . Soki elenge mwasi yango azali awa, ólimbisa ngai, ndeko mwasi. Azali elenge mwasi ya Kentucky, pe tozalaki. . . pe ezalaki mama-bokilo na ye. Pe nazalaki kosolola na ye na butu wana, ngai ná mwasi na ngai, ezalaki na bangonga ya liboso ya ntongo. Mobali na ye atandamaki na nse pe alalaki mpongi; ye alobaki: “Longwa awa! Ozali ata kosala eloko moko te mpo na mama na yo.” Abenganaki ye, mobali na ye, libanda na chambre, mpo alalaki mpenza liboso na ekuke, esika ba-infirmer, moto moko te akokaki kokota; azalaki konguluma, na nse. Bongo, alamusaki ye pe abenganaki ye.

¹²⁵ Pe abandaki kobeta masolo kuna. Ngai nabandaki kosolola na ye na ntina na Nkolo, pe bongo na bongo. Pe alobaki: “Ee,” alobaki, “nyonso ngai nayebaki ezalaki bobele kóngó ya nzete molai bazíngá na nkasa ya makaya, na ntongo-ntongo, nazalaki kolongola matiti mabe zonga-zonga na ba-nzete ya makaya, pe bongo na bongo ndenge wana.” Alobaki: “Kasi, ya solo mpenza,” alobaki, “papa atindaki biso nyonso na eteyelo.” Pe alobaki: “Tozali na biso na mayele mpenza te.”

Nakanisaki: “Ee, ntango mosusu ntina nde yango wana.”

¹²⁶ Bomoni, bo—bosengeli kozala mosika na makambo ya mokili. Sikawa, nalobi te ete boínga eleki malamumu, ezali—ezali bongo te, kasi nazali komeka kokanisa ete soki okómi esika oyo ozali kokanisa ete oyebi mpenza—oyebi mpenza mingi pe bato mosusu nyonso bayebi eloko moko te. Boyebi na yo ezali malamumu ntango nyonso oyo e—etelemeli bilaka na Nzambe te.

¹²⁷ Tokambami na biyokeli mitano, pe biyokeli mitano yango (komona, koléta, komama, koyoka nsolo pe koyoka) ezali malamumu mingi soki etelemeli eyokeli ya Kondima te. Bongo, soki etelemeli Kondima . . . Pe ndenge nini bokoyeba nani azali na solo? Mpamba te Kondima ekoyokana ntango nyonso na Liloba. Na bongo, soki—soki kondima na yo ekesani na Liloba, to okanisi bongo, boye ozali na Kondima te. Ozali na kondima-ya-maloba. Ozali na loléndo na biyokeli na yo, na makambo oyekolaki na kelasi, to eloko mosusu. Kasi soki okabwani na yango pe ozali kotalela na nyonso Kondima, pe Kondima ekoki kotongama bobele likolo na Liloba na Nzambe (Kondima ya solo).

¹²⁸ Mokolo moko, mónganga moko alobaki na ngai, alobaki: “Billy, nakanisi ete soki bato wana . . . soki olobi na bato ete bákende komama likonzí wana, nzete wana, pe bandimi ete bakobikisama, bakobikisama mpenza.”

¹²⁹ Nalobaki: “Te, misie. Ekokoka te, mónganga, mpo na likambo yango moko, omoni, bato wana bayebi ete yango ezali likonzí. Bayebi ete nguya moko te to makasi moko te ezali na likonzí wana.”

¹³⁰ Kasi moto nyonso oyo azali na mayele ayebi ete oyo ezali Liloba ya Nzambe na bomoi, ete nakoki kotia kondima na ngai likolo na yango pe koyeba ete Ezali YANGO ELOBI NKOLO! Pe soki eloko moko ekeseni na Yango, bongo nakondima biyokeli na ngai te. Te, misie, tika yango. Kende na eyokeli na yo mosusu, eyokeli ya Kondima.

¹³¹ Malamumu, Nzambe azuaka bato wana mpo na . . . Ntango bazali bato mpamba, bakomipesa na Ye.

¹³² D. L. Moody ya Chicago, azalaki moto ya Boston, azalaki mobambi sapáto; moto moke pe mokuse, amikokaki te, azalaki komitalela ye moko te. Sikawa, bózua biteyelo minene oyo bazali na yango, Eteyelo Moody oyo kuna, soki Dwight Moody akokaki kosekwa pe komona eteyelo yango, likambo ya liboso Dwight Moody akosala ekozala kolongola eteyelo yango.

¹³³ Soki Martin Luther akokaki kosekwa, likambo ya liboso akosala ezali kolongola ebongiseli ya ba-Luterien. John Wesley akosala ndenge moko. Bato wana babandisaki bibongiseli wana te, bato oyo balandaki bango nde basalaki yango.

¹³⁴ Polo akómisaki lingomba moko ebongiseli te, mpo ye moko alobaki: “Sima na ngai kokende, bato mingi bakotelema kati na bino, bakoteya makambo ya kopengwisa.” Esalemaki sima na liwa ya Polo, pe mibu mokama (to mibale) sima na yango nde basalaki lingomba Katoliko, ebongiseli ya liboso.

¹³⁵ Bato batelemaki! Ezalaki sima na liwa ya Moody nde basalaki Eteyelo Moody; sima na liwa ya Wesley nde basalaki lingomba ya Wesley; sima na liwa ya Luther nde basalaki lingomba ya Luther. Nzambe atindaka bilombe; pe batongaka . . .

136 Kokamwa te ete Yesu alobaki: “Bino—bino bitutú epakolami pembe!” Alobaki: “Bo—bobongisaka ba-nkunda ya basakoli, pe bino nde bokotisaka bango kuna!” Ya solo.

137 Bato minene batelemaki; na sima, batongelaki bango bamonument. Namilobelaka, lokola Dawidi: “Asalelaki Nzambe malamuna ekeke na ye moko.” Boye nde lolenge ya kosala yango. Tika bibongiseli ná makambo mosusu wana, ézala mosika na yo.

138 Moody, mwa mobambi moko ya sapáto, azalaki na bolembu. Azalaki ndakisa ya bolembu. Elobami ete likambo ya liboso Moody asalaki. . . Atángaki ata moke te, elobeli na ye ezalaki malamuna te, ezalaki mabe mpenza. Mokolo moko moto moko ayaki epai na ye pe alobaki: “Misie Moody,” alobaki, “elobeli na yo ezali mabe koleka nyonso nayóká na bomoi na ngai.”

139 Alobaki: “Nazali kondimisa bato na boínga na ngai, yo osalaka nini na mayele na yo?” Namoni ezalaki eyano moko malamuna. Ya solo mpenza!

140 Bongo sikawa, soki okómi moyekoli na eteyelo yango, na ntembe te okokóma moto ya mayele mingi mpenza. Ya solo. [Ndeko mobali moko alobi: “Babóngoli yango mpenza!”—N.D.E.] Sikawa, iyo, “babóngoli yango” ya solo, bazongi na ngámbo mosusu.

141 Yango nde bato basalaka. Ntango nalobaki na ebandeli ya liteya na ngai. . . Esika mpo na Baklisto komikitisa pe kobimisa nyonso kati na bango mpo na kotikela Nzambe esika mingi koleka, bazali komitonga na boyebi ya bato, to na boyebi ya eteyelo ya technique, to mosusu, oyo ezali komema bango mosika na Nzambe, koleka esika bazalaki ntango babandaki.

142 Nakanisaka pe bongo mpo na makambo bato basalaka mpo na kobenga bato na etumbelo. Bokotisa ye, pe mbala na sima, ekokóma mpasi mbala zomi mpo na kozongisa ye lisusu. Botika ye áfanda pe áyoka kino Nzambe akosala eloko moko mpo na ye! Na bongo, botika ye koya koyambola yango, pe átelema, wana azali kobeleva Nkombo na Nkolo. Ya solo.

143 Botala Moody, bolembu na koyekola, bolembu na elobeli, azalaki koloba na zólo. Nauti kotánga lisolo na ye mokolo wana: “Azalaki koloba na zólo, mpasi na zólo.” Na nzoto, azalaki moke, moto na libandi, mandefu na ye ekitaki kino. . . ?. . .; mobali moke pe mokuse. Na nzoto, azalaki mpenza na ntina te. Boye, azalaki bobele na bolembu ntango nyonso. Kasi Nzambe asalelaki ye mpo na koningisa mokili na eleko na ye!

144 Mokolo moko, mopanzi-nsango moko akendeki na liyangani na ye (natángaki yango), bapanzi-nsango, mpo na kopesa nsango na lolenge nini ya moto ye azalaki (moto monene, moto ya lokumu).

145 Wapi eloko moke oyo bakangelaka ba-bande? Yango oyo? Ekosengela na ngai kotelemisa yango wana.

¹⁴⁶ Mo—moto monene, Moody azalaki. Azalaki moto malamamu. Na bongo, akokaki kobenda bokebi ya bato, kosala ete bálanda ye. Bongo, mopanzi-nsango moko akendeki epai ya Moody pe alobaki. . . akendeki na liyangani mpo na kokoma na ntina na monene ya. . .

¹⁴⁷ Lokola mopanzi-nsango oyo akendeki pe akomaki kala mingi te likolo na mopalanganisi moko monene, alobaki: “Moto yango ayebi koloba. Azali Molakisi ya Bonzambe. Azali na elobeli malamamu koleka, nayóká naino te. Bato bazalaki koyoka ye mpo na psychologie na ye. Ayebi kobenda bokebi ya bato.”

¹⁴⁸ “Dwight Moody,” ntango mopanzi-nsango akendeki, alobaki, “Namoni te eloko nini ezali kati na ye, oyo ekoki kobenda bato.” Alobaki: “Likambo ya liboso, azali na elongi mabe mpenza. Ya mibale, na nzoto azali na ntina te. Ya misato” alobaki, “azali, atángá te. Elobeli na ye ezali mabe koleka, nayóká naino te!” Alobaki: “Alobaka na zólo pe péma na ye esalaka makeléle ntango ateyaka.” Pe alobaki: “Namoni eloko moko te kati na Dwight Moody, oyo ekoki kobenda bokebi ya bato.”

¹⁴⁹ Bamemelaki Misie Moody journal yango. Atángaki yango, asekaki mwa moke, alobaki: “Ya solo, ezali ngai te; ezali Nzambe.” Solo mpenza! Bato bayaka komona Dwight Moody te, bayaka komona Nzambe.

¹⁵⁰ Bato bazali na ntina ya litatoli na yo te, bazali na mposa ya eloko ya solosolo kati na bomoi na yo, oyo ekotalisa polele ete Nzambe asimbi yo na loboko. Ata ozali Metodiste, Batiste, Pantekotiste, to nani, bazali na mposa ya komona Nzambe. Ya solo, bato ya. . . bato minene, bato oyo bazali na bolembu pe bayebi bolembu na bango.

¹⁵¹ Bótala Mose, elenge mobali ya mayele. Oh, azalaki na mayele mingi. Ayekolaki mpenza bwanya nyonso ya Baezipito kino akokaki koteya Baebéle. Akokaki koteya Baezipito. Akokaki koteya bato nyonso, mpo Mose azalaki moto monene, moto ya mayele mingi. Oh, azalaki moto na nguya mingi.

¹⁵² Na lolenge ya komona ya Cecil DeMille, ntango—ntango asalaki film ya *Mibeko Zomi*, abengisaki moto oyo azalaki. . . Nabosani nkombo ya moto oyo azalaki Mose na film yango, mosani moko, kasi azalaki engambe, ná maboko minene, moto ya makasi. Pe ntango mosusu Mose azalaki moto ya lolenge wana.

¹⁵³ Toyebi ete azalaki makasi pe ayekolaki malamamu, na bongo amemaki likolo na ye, lokola amonaki mposa ya eleko wana. (Oh, tika ete Nzambe ázindisa yango malamamu!) Lokola amonaki mposa ya eleko wana, Mose, ná nguya na ye ya mayele ya bongó ná makoki azalaki na yango ya kosala yango na. . . Azalaki moto ya mayele mingi. Alingaki kokóma Fáló. Azalaki na psychologie. Azalaki na—azalaki na nguya. Azalaki na makasi ya nzoto. Azalaki na—azalaki na nyonso. Bongo alobaki: “Nazali na oyo

esengeli. Nayebi makambo nyonso. Soki moto moko azali na ekolo, oyo akoki kosala yango, ezali ngai. Na bongo, ngai nde moto ya eleko oyo, bongo nakokende.” Pe akendeki kokokisa mosala oyo ezalaki malamumu pe na mokano ya Nzambe, pe amipesaki na makoki na ye na nzoto. Kasi Nzambe aboyaki yango! Akokaki kosalela eloko moko te ya Mose.

¹⁵⁴ Akokaki kosalela yango te na eleko wana, Akoki te. . . Akoki pe kosalela yango lelo te. Nzambe akoki kosalela makoki na biso ya nzoto te. Bisó ná makoki na biso, tosengeli komilongola na nzela, pe komipesa na mokano pe nguya ya Nzambe.

¹⁵⁵ Okoloba: “Ee, ndeko, nakoki koteya.” Akoki kosalela yango te ntango nyonso oyo *yo* okoki koteya. “Ezali malamumu, nakoki kosala likambo *oyo*, nakoki kosala likambo oyo *kuna*.” Okoki kosala eloko moko te. Ee, bongo, Nzambe akoki kosalela yango te. Kasi soki omipesi na Nzambe pe otiki Ye kosala yango!

¹⁵⁶ Okoloba: “Ee, Ndeko Branham, nayebi. Nazali molakisi.” Ee, ntango nyonso oyo *yo ozali* molakisi, ee, Ye akokende mosika te. Kasi Molimo Mosantu azali Molakisi na biso. Ya solo, Ye nde! Nzambe atindaki Molimo Mosantu mpo na kozala Molakisi likolo na Lingomba.

¹⁵⁷ Bato mosusu bakendeke na eteyelo ya kelasi mibu na mibu na mibu. Basalaka nini? Batángaka makambo esalemaki na Eteni ya ndako ya Likolo, pe boye (oh, ezali malamumu) boyekolaka malakisi ya eteyelo ya lomingo ya Ekólo mobimba. Nazali kotelemela yango te. Ezali Maloba na Nzambe, pe nyonso wana, kasi esangisami ná mayele ya bongó! Esengeli kouta na nguya pe na lisekwa ya Klisto, pe bokoki kotalela makoki na bino ya nzoto te.

¹⁵⁸ Na bongo, Mose, elenge engambe makasi oyo, moto ya mayele, akendeki mpo na kosala mosala malamumu; kasi nde, Nzambe akokaki kosalela yango te. Akokaki kosalela makoki na ye ya nzoto te.

¹⁵⁹ Pe tokoki te. . . Ezali lelo te, nde tokoki te. . . Nzambe akoki kosalela makoki na biso ya bomoto te.

¹⁶⁰ Kasi Mose azalaki na eloko moko oyo nasepelaka na yango, azalaki na mayele ekoki mpo na koyeba ete alongami. Bisó tozali na yango te. Esili. “Tokobanda ebongiseli ya *sika*. Tokozua moto mosusu oyo azali na likabo ya lobiko na nzoto, to eloko mosusu,” ba-Pantekotiste, bomoni. Bomoni? To-tozali mpenza na boyebi ekoki te mpo na kososola ete tolongami. Lingomba ya ba-Pantekotiste, ba-Assemblée de Dieu, ba-Unifié, ná bamosusu, ezali lokola bazangi makoki ya koyeba ete balongami. Aleluya! Oh, soki nakoki kokotisa likambo yango malamumu. Balongami. Ebongiseli ya lingomba elongami. Ndenge moko oyo Etats-Unis elongami, ezali kolenga pe kobanga, ba-bómbe etiami kuna likolo mpo na bango, bayebi ete babínaki mingi pe bamemaki bomoi na bango kino lifelo. Pe balongami, Molimo esilá kotika

bango. Esengeli na bino koluka-luka ba-nzete mpo na komema bilenge mibali na mampinga; bamonaki makambo ekómelaki bamosusu. Tolongami! Lingomba elongami. Bayebi yango.

¹⁶¹ Mose asosolaki yango, bongo ayebaki malamumu . . . Nzambe amemaki ye kuna na sima, na biliki, mpo na kolakisa ye bolembu ya bato. Amemaki ye kuna na sima mpo na kolakisa ye ndenge makambo ezalaka. Ayekolaki malamumu mpenza! Oh! la la! Ayekolaki mpenza malakisi! Esengelaki na Nzambe kozua ntango elongo na ye kuna na sima! Boyebi, Mose azalaki moto na nkanda; Nzambe apesaki ye mwasi na nkombo Sefora, ye pe azalaki bongo. Boye, namoni ete makambo nyonso ezalaki kotambola malamumu mpenza te kuna na biliki, na ntango moko, wana bango mibale bazalaki kotomboka mbala moko.

¹⁶² Nakanisi ete lolenge na ye ya komona ya psychologie, ndenge moto asengeli kokambama, esungaki mpenza te, mpo, ntango azalaki kokende na Ezipito, namoni ete Sefora azalaki naino na nkanda. Akataki mwana na ye ya mobali ngenga pe abwakaki yango liboso na Mose, alobaki: “Ozali mobali ya nsómo mpo na ngai.”

¹⁶³ Nzambe ayokelaki ye nkanda mingi kino A. . . na suka, Alukaki ye, soki Ámonaki ye Alingaki koboma ye. Nabanzi makambo mosusu ezalaki, oyo Nzambe asengelaki kolakisa ye kuna, bomoni, ete azalaki moto. Bwanya na ye nyonso ya Ezipito pe nguya na ye nyonso ya mayele ya bongó, Nzambe akokaki kosalela moko na yango te.

¹⁶⁴ Boyaka koloba: “Sikawa, Nkolo, nayekoli na eteyelo mibu ntuku minei sikawa, nazali—nazali moyekoli ya mayele mingi. Nakoki kozongela maloba ya Biblia oyo wana nakangi miso.” Nzambe akoki kosalela yango ata moke te. Bomoni? Te.

¹⁶⁵ “Oh, nazalaka moto ya lingomba oyo eleki monene na ekólo. Na—nazali. . . Nazali moto *boye*, Nkoló. Oh, nazali Pantekotiste. Na. . . Nkembo na Nzambe! Nauti kozua Molimo Mosantu na butu eleki. Aléluya! Osengeli kokomisa ngai kosala *boye na boye*.” Nzambe akoki kosalela yango ata moke te. Te!

¹⁶⁶ Soki onlongami pe ososoli ete onlongami, na ntango wana zonga pe mikitisa. Kómá na bolembu, yeba ete ozali moto. Pe mayele na yo ekoki ata moke te ko. . . Nzambe akosalela bolembu ya moto ata mokolo moko te; na nzela na bolembu ya moto, Nzambe Ye moko akomikitisa kati na yo, na sima Akomisalela Ye moko. Yo okómi bobele esalelo. Ya solo! Osengeli komilongola na nzela.

¹⁶⁷ Mose, oh, ayekolaki, ayekolaki malamumu mpenza ba-bolembu ya bomoto. Ayekolaki yango malamumu mpenza, kino, ntango Nzambe abengaki ye, azalaki na bolembu nsambo akokaki kolobela mpo na koboya mbela ya Nzambe. Bosilá koyekola yango na eteni ya liboso ya Esode, bolembu nsambo yango? Nana komaki yango awa. Nalingi ete bóyoka yango. Bolembu ya

liboso azalaki na yango ezalaki kozanga nsango. Bolembu ya mibale azalaki na yango ezalaki kozanga bokonzi. Bolembu ya misato azalaki na yango ezalaki kozanga elobeli malamau. Ya minei ezalaki kondima mbongwana. Ya mitano ezalaki kolonga. Pe ya motoba ezalaki kopona-pona.

168 Sikawa, yo, kokanisa ya yo na oyo ya ye mpo na koyeba soki okoki kolonga na yango, mpo na koyeba soki okoki kozala na bolembu lokola ye azalaki. “Yahwe, na—nazali malamau ata moke te. Nayebi koloba te. Na—na—nabomaki mo—Ezipito. Nakoki kozonga te. Oh, nyonso wana! Bakoyamba ngai te. Nazali na nsango te. Nazali na . . . nayebi koloba te. Pe na—nalobaka malembe.” Bomoni ndenge azalaki? Azalaki moto mpamba! Bandeko, asilaki kokaukisama. Iyo, ntango wana nde Nzambe akokaki kosalela ye, sima na ye kokaukisama. Bomoni? Iyo.

169 Iyo, Akoki kosalela biso sima na biso kokaukisama, koyeba ete Doctorat na ngai ya Philosophie, Doctorat na ngai ya Droit pe Doctorat na ngai mbala mibale ya Droit,” to eloko nini, “ba-diplome na ngai nyonso ezali mpamba.” Nzambe akoki kosalela yango te!

170 “Ee, nazali moto ya ba-Assemblée de Dieu. Nazali moto ya Unitaires. Nazali mo-Baptiste. Nazali mo-Presbyterien.” Nzambe akoki kosalela yango ata moke te! Noki-noki okokabwana na yango, ee, malamau koleka pe yo oko—oko—okomipesa na Nzambe.

171 Lokola mosakoli, alobaki: “Nazali moto na bibebu ya mbindo, pe nafandi elongo na bato ya mbindo.” Pe Mwanje akendeki kozua e—esimbeli, akendeki na etumbelo, azuaki likala ya móto pe amamaki bibebu na ye. Bongo agángaki: “Yahwe, ngai oyo; tinda ngai.” Iyo, sima na ye kososola ete a . . . Ata azalaki mosakoli, azalaki na bibebu ya mbindo.

172 Bobele ntango tososoli ete tozali—tozali bato mpamba, ete ozali moto mpamba, ozali mputulú ya mabelé . . . Nzambe akoki kosalela yo te . . . Iyo, lobik- . . . Bolembu na yo nyonso ekokokana na oyo ya Mose te. Azalaki na bolembu ekeseni motoba awa, pe ayekolaki bolembu ya bomoto.

173 Sikawa bótala bokeseni kati na Mose wana, oyo akutanaki na Nzambe, ná Mose oyo azalaki kotala . . . ? . . . lokola lelo. Alobaki: “Eh, tosengeli na *boye na boye!* Tosengeli na kolamuka kati na ekólo. Nakoyebisa bino likambo nakosala, nakozonga koyekola mpo na kozua diplóme ya graduat na lettres. Ah-ha! Nakozonga koyekola mpo na kozua diplóme ya Doctorat na Philosophie. Nakoyekola kokoma ba-búku. Nakosala nyonso wana, bongo ntango nakosilisa, nakokóma ‘moto ya eleko oyo’. Nakomelisa bato nyonso oyo péma, baoyo babandaki kuna.” (Oh, ndeko!) Nakotongisa ndako ya ba-dollars milión misato. Nakosomba mituka ya kitoko koleka zomi na mibale. Pe . . .” Oh, ndeko! Ekozala malamau—ekozala malamau mpo na yo kobanda

na yo te, mpo osili kolongama longwa ebandeli, omoni. Kasi likambo ezali ete bayebi yango te!

¹⁷⁴ Bakanisaka ete esengeli kozala na suki elíngámá, kolata kazaka ya smoking pe koloba: “ah-man” ya kitoko mpenza, pe makambo ya ndenge wana, mpo na kozala mwana mokonzi. Oyo wana ezali marionette ya mwasi!

Nzambe asengeli na mibali, mibali ya búle, mibali oyo bakoki koningisa!

¹⁷⁵ Kasi lelo tolingi Hollywood. Tolingi eloko oyo—oyo ekosepelisa miso. Tolingi eloko oyo ekoki koloba na mayele mingi na lolenge ete akoki kotika biso kolala mpongi miníti mitano wana ye. . . . mokolo ya lomongo na ntongo.

¹⁷⁶ Nzambe alingi bakaboli oyo bakopanza lokola pole makasi ya mikalíkálí, baoyo bakokweisa lisumu kino na misisá, (ya solo) oyo bakopikola yango.

¹⁷⁷ Kasi tozali. . . . Tolingi bakengeli na biso ya mayele mingi. Bato mingi balingaka bakengeli oyo balobaka na mongongo ya nse, moto oyo alobaka: “Iyo, molingami na ngai.”

Nzambe alingaka konguluma lokola nkake! Iyo, misie.

¹⁷⁸ Kobembelisa bango na mokongo, ná suki mikuse pe kopakola-pakola, pe nyonso wana, pe kolata bilamba oyo emeli bango, pe nyonso wana, kasi koloba eloko moko te kotelemela yango.

¹⁷⁹ Moto monene moko abengisaki ngai na bureau na ye awa, (bureau na ye te) bureau ya libanda ya lisano, awa eleki mpenza ntango molai te, alobaki: “Nalingi kotia maboko likolo na yo mpo ótika makambo yango!”

Nalobaki: “Komeka na yo te. Komeka na yo te. Te, misie.”

¹⁸⁰ Soki opekisi yango, opekisi nde Nsango. Opekisi Nzambe soki osali bongo. Iyo, misie. Tolingi yango ata moke te.

¹⁸¹ Nzambe ayokelaki nde Mose mawa mpo na bolembu na ye nyonso wana, mpo na koloba: “Mose mawa ee, na ntembe te eloko moko—eloko moko ekómeli yo, okiti na nse ya mosanda? Oh! la la! Awa, iyo, ozalaki moto monene, ya mayele, pe eloko moko te ekokaki kopekisa yo. Ndeko, ozalaki na ba-Doctorat na yo ya Philosophe ná ya Droit, pe nyonso mosusu, bongo sikawa okómi koya kotatola ete ozali moto mpamba, okoki kosala eloko moko te. Okómi—okómi na bolembu makasi boye?” Te! Nzambe ayokelaki ye mawa te. Nzambe ayokaki mawa mpo na ye te. Nzambe nde akangolaki ye na makambo nyonso wana. Ayokelaki ye mawa te.

¹⁸² Kasi tomoni, soki bozali kokoma yango, na Esode 4:14, “Nkanda na Nzambe engalelaki ye.” Nzambe ayokelaki ye mawa te mpo azalaki na bolembu.

183 Okoloba: “E Nkolo, nazali komiyoka mpenza malamu te, nandimi te ete nakoki kosala yango.” Nzambe akoyokela yo mawa te; azali na mposa ya kosukuma yo mwa moke. Bomoni? Bomoni? Ya solo. Nzambe akoyokela yo mawa te; A—Azali nde na nkanda na yo. Ozali kobongisama na lolenge oyo Ye akoki kosalela yo. Iyo.

184 Mose akangolamaki mpenza, mpo Nzambe ákoka kosalela ye. Akangolamaki, na bongo akómaki mosika na makoki ya bomoto. Azalaki lisusu na eloko oyo akokaki kotalela te na ntango wana, mpo a—abongisamaki mpo na mosala.

185 Nzambe alobaki: “Nazalaki na bino awa mibu ntuku minei, yo ná Sefora, bobele kowelana pe kondongwana awa na biliki oyo, mpo ókoka kososola soki bolembu ya bomoto ezali to te, kuna ozalaki lokola mwana mokonzi monene: ‘Mbote, Molakisi Mose. Mbote, Reverend, Misie. Iyo, misie. Mose, yo nde okokóma mokonzi. Nyonso. . .Biso nyonso tosepelaka na yo.’ Sikawa ozali awa na biliki elongo na etonga ya ba-mpate ná mwasi ya nkanda mingi.” Bomoni? Yango nde ebongisaki ye. Iyo, misie. Mose azalaki na nkaka mpenza, kasi Alobaki: “Sikawa Nakoki kosalela yo, soki ososoli ete ozali moto mpamba. Sikawa yaka awa, pembeni na nzete ezali kopela móto, Nalingi kotinda yo kuna.” Oh! la la!

186 Nzambe, pesa biso lisusu bato ya lolenge wana, pesa biso lisusu bato bazángá makasi. Yango nde tosengeli na yango, bato bazángá makasi. Ya solo!

187 Ezalaki Yakobo, boyebi. Na ntango moko, Yakobo akanisaki ete azalaki moto monene, boyebi, akokaki kokosa pe komilongisa na yango. Akendeki kotia bitápe ya nzete ya libene esika ba-mpate ná bibwele ya bokilo na ye ezalaki, ntango bazalaki na zemi, pe akómisaki bango ba-mpate ya matóno, bazalaki komibwaka boye ntango bazalaki kokende komela mai. Pe, na mbala moko, Yakobo akómaki moto monene. Na ntembe te. Azalaki. . . “Abengamaki mpenza *Yakobo*, ezalaki libunga te,” Esau alobaki, “azalaki ‘mokosi’ ya solo.” Na bongo azalaki mobúbi. Azalaki kokende se liboso, kofúluka, azalaki na bitóngá minene, basi, ba-mpate, bibwele, ba-ngombe, pe—pe biloko nyonso, azalaki na nyonso.

188 Kasi na butu moko (oh! la la!) mokolo moko, ntango akómaki na mwa mokele na mai, alingaki kokatisa yango, akómaki esika oyo Mwanje akangaki ye. Ndeko, Yakobo asalaki makasi butu mobimba. Ya solo asalaki makasi ntango molai. Kasi ntango amitikaki, ntango alembaki pe makasi esilaki ye nye. . .

189 E Nzambe, tika ete lingomba ékóma ndenge wana, ékóma. . . lingomba ékóma esika oyo ekoki lisusu kosala makasi te na makoki na yango ya nzoto, kasi esengeli komipesa mobimba na Nzambe. Tika ete ba-Methodiste bámiyoka nsoni kozala ba-

Metodiste. Tika ete ba-Batiste pe ba-Pantekotiste bámiyoka nsoni, pe bítika kosala makasi, pe bámpesa na Molimo.

¹⁹⁰ Na ntango wana nde Yakobo akómaki “mwana mokonzi ya Nzambe”. Biblia elobi ete akómaki “mwana mokonzi”, pe nkombo na ye ebongwanaki. Bomoni? Pe—pe, bobosana te, na ngámbo *oyo*, azalaki moto monene ya makasi, ná nguya ya mayele; kasi na ngámbo *oyo kuna* akómaki mwana mokonzi moténgumi, ná bolembu pe kosokema, kasi azalaki na nguya liboso na Nzambe.

¹⁹¹ Iyo, okoki . . . Ebongiseli na bino ekoki kopanzana na biteni. Lokumu na yo mpo na bazalani, okoki kokóma “eyanganga esílá ngala” kobanda wana, mpo na bazalani. Ekoki kozala bongo. Kasi boyoka ngai, bokozala na nguya elongo na Nzambe. Malamu mpo na ngai kozala ndenge wana. Nakolanda nzela yango ntango nyonso.

¹⁹² Bayekoli bazongaki pe basepelaki, mpo bazalaki na esengo komona ete bakokaki komema nsoni ya Likambo yango pe ya Yesu. Ya solo! Bakobenga yo “motúntuki”.

¹⁹³ Bimá naino na esika yango, tika yango épanzana. Míkangóla na makambo na yo, “Ee, tala, nazali Metodiste,” to “Presbiterien” to “nazali moto ya ba-Assemblée,” “nazali moto ya ba-Unitaire, nazali pe malamau lokola bino.” Malamau. Bimá naino na makambo yango, tika yango. Sala . . .

¹⁹⁴ Tika mwanje ákanga yo naino, mwanje na Nkolo oyo akomemela yo Solo ya Nsango. Tika ye ákanga yo naino, okomikitisa kino libatisi na Nkombo na Yesu, okomikitisa kino na Makambo nyonso mosusu. Iyo, ya solo, na ntembe te, okosala yango. Iyo, oko—okobosana mayele nyonso wana.

¹⁹⁵ Eleki mwa mikolo, moko na baninga na ngai ya malumu koleka, moto malamau, alobaki na ngai, nazalaki kobima na bureau, nautaki kosilisa masolo, nabimaki na bureau, alobaki: “Ndeko Branham. . .” Pe moto yango azali moko na bato basungaka ngai na misolo mpo na mayangani kuna. Ekomaki esika moko oyo nayebaki te ndenge nini nakokaki kosala mpo na kokoba na makambo, bobele kotalela Nzambe; moto yango azalaki kosilisa makambo yango. Iyo, moto malamau mpenza! Pe moto yango asalaki mobembo, kouta na engumba moko monene, ayaki awa eleki mwa ba-mpokwa, atelemaki wana pe alobaki na ngai na mpokwa moko, alobaki: “Ndeko Branham,” alobaki, “nalingi koloba bobele likambo moko.” Alobaki: “Ata moto moko te azali, oyo azangi kolinga yo, na ndenge nayebi.”

Nalobaki: “Nasepeli na yango mingi.”

¹⁹⁶ Alobaki: “Ndeko Branham, ezali bobele na likambo moko, likambo moko ya mabe.”

Nalobaki: “Likambo yango ezali nini, ndeko mwasi?”

197 Alobaki: “Ee, likambo yango moko ezali oyo, Ndeko Branham, soki okoki bobele kotia pembeni mwa moke Malakisi na yo,” alobaki, “bibongiseli nyonso ekoyamba yo.”

198 Nasosolaki mbala moko, nakanisaki . . . Nalobaki: “Malakisi nini, ndeko mwasi?”

Alobaki: “Oh, libatisi wana ya Nkombo na Yesu.”

199 “Oh!” Nalobaki: “Kasi, ndeko mwasi, kokanisa te ete nakoki kotia pembeni Liloba na Nzambe pe nákoba kozala mosali ya Nzambe.”

200 Alobaki: “Ee, tala, awa nazali kotalisa ebele na batei ya engumba monene oyo.” Alobaki: “Soki oyebisi bango ete Mwanje na Nkolo, oyo apesaka yo mamono, nde alobelaki yo likambo ya kobatisa na Nkombo na Yesu, wana bakoki kondima Yango.”

201 “Ee,” nalobaki, “kobikela na bango ezali na nse koleká mai ya bosoto!” Nalobaki: “Ata mwanje alobi likambo nini, soki elongobani na Liloba te, nakondima yango te!” Nalobaki: “Soki mwanje yango ayebisi ngai likambo kokesene na Yango, nakondima mwanje yango te.” Ya solo! Liloba na Nzambe ezali esika ya liboso, likolo na banje nyonso pe makambo nyonso mosusu! Mwanje ya solo . . . Nalobaki: “Soki ayebisaki ngai Yango te, nalingaki koyoka ye te.” Iyo.

202 Mwasi yango ayebaki likambo ya kosala te. Alobaki: “Nayóká naino likambo ya boye te. Nayebaki Yango ata moke te.” Bomoni, ezali mpenza yango. Bongo, napesaki mwasi yango biteni ya Makomi. Pe alobaki: “Nazali kozonga noki na ndako mpo na koyekola Kondimana ya Sika. Nayekólá Yango naino te.” Bomoni, ezali mpenza yango. Oh! la la! Oh! la la! Bótala esika bokómi. Oh! la la!

203 Botika komeka kotingama. Bomítika! Yango nde bosengeli kosala: komitika. Yakobo, ntango amitikaki akómaki malamumu mpenza, akómaki mwana mokonzi pe azalaki na nguya elongo na Nzambe.

204 Azalaki *elenge* Dawidi, ná molato ya Saulo ya lingomba, ntango akendeki ko—ko—kobundisa Goliath. Ntango Dawidi akendeki kobundisa Goliath kuna ná ebundeli ya monene nyonso wana, atalaki zinga-zinga pe atalaki na sima, azalaki lokola bato nyonso, bongo alobaki: “Eloko moko ezali kotambola malamumu te awa.”

205 Ntango nyonso oyo ozali lokola mokili, pe ozali na boyokani ná mokili, pe ozali kosala makambo ndenge moko na mokili, eloko moko ezali kotambola malamumu te.

206 Dawidi alobaki: “Eloko oyo emonani lokola eleki makasi. Nazali na Diplóme ya Molakisi, nazali na Doctorat ya Philosophie. Bomoni, nazali moto ya ebogiseli monene, nakokende kobunda ná biloko nyonso oyo ndenge nini? Nayebi ata likambo moko na yango te. Nayebi ata likambo moko na

yango te!” Dawidi alobaki: “Bólongola ngai biloko oyo.” Ya solo. “Soki nasengeli kobunda mpo na Nzambe, naboyi kozala lokola bibángábanga oyo bazali awa, balatisami mobimba na bibundeli ezali na madusu. Nakoki kozala na liyangani te. . .”

207 Mayangani mingi, bato mingi, batei mingi bakómelaka ngai pe batatolaka ete bandimaka ete Nkombo na Yesu Klisto nde esengeli mpo na kobatisama, kasi balobaka: “Ebongiseli na biso ekobengana biso.” Bozali komilongisa mpamba! Bólongola bibundeli wana ya Saulo!

208 Pesa ngai nguya pe makasi ya Molimo Mosantu! E Nzambe, tinda ngai ná bilingóngo, ata eloko nini (ya moke mpenza), bámbóla yango monguna. Ya solo. Tinda ngai, kasi kotika ngai koláta lokola bamosusu te, ná ba-Doctorat ya Droit, Doctorat ya Philosophie, Balakisi, pe makambo nyonso ya ndenge wana.

209 Dawidi alobaki: “Eloko yango emonani mpenza malamumu te.” Alobaki: “Nayebi yango ata moke te.” Alobaki: “Eloko bobele moko ngai nayebi, oyo nazali na yango na . . . Kuna na sima ya biliki nazalaki kobokola ba-mpate ya tata na ngai.” Pe alobaki: “Nkosi moko ayaki, pe akangaki mwana mpate, abimaki pe akimaki na yango, pe nayebaki ete ezalaki mwana mpate ya tata na ngai, pe, oh, na—na—nazali. . . nazalaki na bibundeli te, kasi nazuaki bobele bilingóngo na ngai pe nalandaki ye.” Alobaki: “Nabomaki ye pe nazongisaki mwana mpate yango.” Oh! la la! Bango bazalaki wana, ná makongá na maboko, bakokaki kosala yango te.

210 Yango nde likambo ya mpasi lelo. Nzambe azali na ba-mpate mingi oyo babúngá nzela, bibongiseli ná biloko mosusu ebúngísá bango nzela, ekótisa bango na makambo ya psychologie. Tika ete Nzambe ápesa biso ba-Dawidi oyo bazali na Liloba na Nzambe ná nguya ya Nzambe, mpo na kokamba yango ntango ya kokende kokutana na bingambe ya maye oyo (bókanisa, bazali na ba-diplome ya Droit pe ya Humanité, ba-diplome ya eteyelo Q.U.S.T., to mosusu nyonso). Pesa ngai Liloba na Nzambe pe nguya ya Molimo Mosantu pe, nayebisi bino, tokoki koboma bingambe nyonso na elanga. Ya solo! Tosengeli na bato oyo bakoki. . .

211 Ee, Dawidi azalaki ndakisa esengelaki mpenza te na elanga mobimba, mpo na kokende kobundisa engambe wana. Ye, ee, azalaki bobele mwana moke. Pe Biblia elobi ete azalaki “motane”, mwana mobali ya nzoto moke mpenza, mbala mosusu mapeka egúmbámá, amizingaki na eteni ya lopuso ya mpate. Azalaki na ba-diplome minene ya bato ya maye pe batángá mingi te. Ayebaki eloko moko te likolo na mopanga. Ayebaki eloko moko te likolo na koyekola nyonso oyo Saulo. . .

212 Saulo azalaki moto ya malamumu koleka kati na bango, Episkopo Saulo. Ya solo, azalaki mbinga pe molai koleka

mapinga nyonso. Ee, ye nde—ye nde asengelaki kokende kobundisa ye, kasi azalaki kobanga.

213 Pe lelo toyebi ete tosengeli na kolamuka. Toyebi ete tosengeli na kosukuma kati na bato. Esengeli na Molakisi ya Bonzambe te. Esengeli moto na bolembu (Aleluya) oyo akozua Liloba na Nzambe na nguya ya lisekwa ya Klisto mpo na koboma eloko yango. Ekomema Klisto na ekólo na... mpo na bango komona ete Azali naino na makoki ya kofungola miso ya bakufi miso, kobikisa babeli, kosekwisa bakufi, pe ete Azali Nzambe, Molongi! Amen. Tosengeli na Dawidi, oyo ayekoli na biteyelo ya likindo te, tosengeli na moto oyo ayebi yango ata moke te, basali bilanga to eloko moko, moto moke moko ná mapeka egúmbámá, kitoko mpenza te na kotala, moto oyo akotambola na nguya ya Nzambe.

214 Ekómaki mama pene na kokufa, alobaki: “Billy, natielaki yo motema pe nandimelaki yo. Ozalaki makasi na ngai ya molimo, okambaki ngai na Nzambe.”

215 Nalobaki: “Mama, ezalaki ngai mwana moke... Bankóko na biso, na ntembe te, ba-Irlandais, bazalaka mwa moke ba-Katoliko.” Pe nalobaki: “Lingomba elobaki yango, ete ‘Ba—bazalaki etóngá ya bato, bazalaki na yango mobimba, nyonso basalaki ezalaki malamú.’ Nakokaki kondima yango te, mpo ba-Lutherien balobaka: ‘Tozali etóngá ya bato, tozali na yango nyonso.’ Ba-Batiste balobaka: ‘Tozali etóngá, tozali na yango nyonso.’ Eleki mingi mpenza, ezali na bibongiseli pene na nkama libwa.” Nalobaki: “Mama, nakokaki kotia motema na moko na yango te, nani kati na yango ezali malamú?”

216 Nakomaki kososola, nazali koloba yango na komikitisa pe na bopolo, kasi nandimaka ete ata moko te na yango ezali malamú. Ya solo. Ntango nazongi na Liloba na Nzambe, namonaki makambo Yango esalaki kuna. (Na sima, e Nzambe, tika ete biso nyonso tózonga kuna.) Ná bolembu, pe kozanga lisungi ya mangomba, kozanga lisungi ya bibongiseli, kozanga lisungi ya bakonzi batiámá na mangomba, kasi na komikitisa pe na nguya ya Molimo Mosantu oyo ekitaki na Pantekote, elongo ná liteya yango moko Petelo ateyaki Mokolo ya Pantekote: “Bóbongola mitema, moko na moko na bino, pe bóbatisama na Nkombo na Yesu Klisto mpo na bolimbisi ya masumu na bino.”

217 Bokotiana ekanganeli lokola bato na likindo te, ná kingo ya elamba ezóngá sima pe ba-diplóme ya Licence en Lettre. Kasi, ndeko, okozala na eloko moko na loboko, pe ntango nyonso oyo Molimo na Nzambe ekokota kati na Liloba yango, Ekolonga pe Ekozongisa ba-mpate babúngá na nzela. Amen! Tótatola bolembu na biso! Bóbwaka Malakisi na bino ya Likindo! Bóbwaka boyebi-makambo-nyonso na bino, ba-kálati ya mondimi! Bómilongola mobimba liboso na Nzambe, na elobeli ya molimo, pe bómimona “bobongi te!” Na ntango wana

nde Nzambe akobanda kosalela yo. Koloba yango bobele na monoko te, loba yango uta na motema na yo.

218 Yakobo, Dawidi, basengelaki komilongola mobimba. Azalaki moto na bolembu koleka kati na bango nyonso.

219 Bókanisa, ntango mosusu, basodá nkóto zomi to nkoto mokama bazalaki likolo na ngomba. Bango nyonso bayekolisámá, bango nyonso bazalaki na ba-diplome ya Philosophie, bango nyonso bazalaki na makongá, bazalaki basodá. Moko na moko na bango azalaki Caporal *Songolo*, Likili *Songolo* (ata ba-Likili), General *Songolo*, Lietenant *Songolo*. “General Mokonzi monene ya minzoto minei Saulo, Episkopo, iyo, Lokumu na yo, Misie!” Bato nyonso bazalaki wana, bato bayekolá.

220 Pe monguna azalaki likolo na ngomba, alobaki: “Bino bibánga-banga.” Oh!

221 Pe kuna na molako, mwana moke moko ayaki, mapeka ekwéyá, (E Nzambe!), mwana moke moko ya motáne, ná mwa bilinóngo na mokongo, ná gateau ya raisin na loboko mpo na ndeko na ye. Pe engambe wana abimaki pe agángaki lokola mbala na mbala. Alobaki: “Bolingi koyebisa ngai ete bino bato botángá mingi awa, botelemi wana pe bozali kotika Mofilistia esuté oyo kobeta móndenge na Liloba ya Nzambe na bomoi?” Amen! Alobaki: “Bozali kobanga ye?”

222 Saulo alobaki: “Soki olingi kokende, yaka awa. Nako—nako—nakotinda yo na eteyelo mibu ntuku mibale sikawa, pe nakopesa yo di—diplôme ya Philosophie. Yoka likambo nakosala, nakopesa yo diplôme na ngai.”

223 Alobaki: “Longola eloko yango.” Oh! la la! “Nazali na ntina na yango te.” Alingaki kotia motema na Nzambe. Alobaki: “Nayebi makambo Nzambe asalaki mpo na ngai na elóko oyo, pe nakotia motema na Nzambe liboso na makambo nyonso, ná yango.” Amen! Yango nde kobikela likambo ya Moklisto.

224 Ata Saulo, ntango asengelaki kolongola ebundeli na ye, alongolaki ebundeli ya lingomba, asalaki lokola Dawidi. Kasi ntango Saulo akómaki na suka ya mobembo, alobaki: “Nabundaki etumba malamú.” Ezalaki monguna ya suka ya kolonga. “Nabundaki etumba malamú, napotaki mbangu kino suka, nabateli Kondima. Sikawa ebombameli ngai motóle, oyo Nkolo, Mosambisi sembo, akopesa ngai mokolo yango.” Alobaki: “Bobele ngai moko te, kasi pe baoyo nyonso balingi komonana na Ye.”

225 Oh, kufa elobaki: “Kasi etikali moke nakozua yo.” Nkunda pe elobaki: “Kuna, nakonyáta yo.”

226 Alobaki: “E kufa, wapi esweli na yo? Nkunda, wapi elonga na yo? Nayebi ete nazali awa na boloko ya libúlú ya Roma, bakangi ngai minyolólo, na maboko na ngai nyonso, pe na—nazali na

bilembo ntuku misato na libwa ya fimbo na mokongo na ngai. Nazali awa ná mpisoli na miso na ngai, kotoka kino nakoki lisusu komona te. Nakoki komona te na miso na ngai ya nzoto, kasi nazali komona motóle ya boyengebene ezali kozela ngai kuna. Matíndí na ngai elembi. Nakwei mingi mpenza mpo na mápa ya kala, enyángwe, oyo babwakaki awa, ba-mpúku bamateli ngai, pe mampúlututú ná biloko mosusu, kino nalembi.” Kasi akokaki kotelema liboso na kufa pe koloba: “Wapi esweli na yo? Nkunda, wapi elonga na yo?” ná minyolólo koningana na maboko na ye. Aleluya! (Yango nde tosendeli na yango.) “Nkunda, wapi elonga na yo?”

Nkunda elobaki: “Nakopolisa yo, Polo.”

227 Alobaki: “Kasi Matondi na Nzambe, nasílá kozua elonga na nzela ya Nkolo na biso Yesu Klisto.”

228 Ntango alembaki, makambo na ye ya—ya mokonzi ya lingomba . . . milúlú na ye nyonso esilaki kolongolama pe kobima kati na ye. Mikanda na ye nyonso ya kobulisama na bonganganzambe, basilaki kobótola ye yango. Azalaki lisusu moto ya ba-Assemblée te, to . . . ata moko te. Bomoni, azalaki lisusu moko na bango te. Azaláki koloba makambo makasi mingi kotelemela bango kino ba-episkopo yango bazalaki . . . balobaki: “Olingi koloba na ngai ete moto oyo asali mosala mibu ntuku mibale kuna na boloko ya Roma pe akoki koloba na biso kopekisa basi na biso koteya? Ha! Koloba na biso bongo te,” alobaki, “toyebi malamau koleka. Ata bongo, ye azali nani kuna mpo na koloba na biso ete tósala *boye* na *boye* to *boye*?” Alobaki: “Toyebi likambo tozali kosala.”

229 “Iyo,” Polo alobaki, “bato mosusu bakotelema kati na bino, bakobanda bibongiseli sima na ntango moke, bakotelema pe bakotángwa na Kondima ndenge wana, bazali na Molimo ya Nzambe te.” Alobaki: “Basili kobima kati na biso mpo bazalaki ya biso te.”

230 Pe, likambo nini esalemaki? Bakotaki mbala moko na lingomba Katoliko; longwa na Katoliko kino na ba-Lutherien; pe bongo na bongo kino na suka, ba-Assemblée de Dieu, ndenge moko, bazali kosala ndenge moko.

Longwa ebandeli, ndenge moko!

231 Kasi, oh, mpo na mobali to mwasi oyo azali mpenza na bolembu, oyo asosoli bolembu na ye, oyo akotika Nzambe kosalela ye! Nazali bobele kokoba koloba, nakanisi nalobi mingi koleka.

232 Sikawa, ezalaki nini? Sikawa, azalaki . . . Dawidi azalaki moyinga koleka kati na bango. Azalaki na mayele ya bitumba te, ayebaki yango ata moke te. Bongo, azalaki na mayele ata moke te ya etumba oyo ezalaki liboso na ye, kasi ayebaki ete Nzambe azali. Pe azuaki eloko ya bolembu koleka; bango bazalaki na makongá, bibundeli, matimbó, pe nyonso mosusu, kasi Dawidi

azalaki na mwa bilingóno oyo ezalaki na libanga kati na yango. Kasi, bomoni, ayebaki esika nini ye atiaki motema. Atatolaki bolembu na ye, kasi kondima na ye ezalaki na Nzambe.

²³³ Alobaki: “Nazali na ntina ya nguba likolo na ngai te mpo na komibatela. Nazali na ntina ya kokende kuna te, koloba: ‘Sikawa, bandeko, bolingi koyokana na ngai? Nazali moto ya ba-Assemblée, nazali moto ya Presbiterien, nazali Metodiste, nazali Batiste, bandeko, bolingi koyokana na ngai?’ Nazali na ntina ya koyeba makambo nyonso wana te. ‘Tala, nakolakisa yo na líbanga na ngai, nazuaki diplóme na ngai. Nauti kozua Licence en Lettre. Nauti na Université *Songolo*, na—nayekolaki kuna. Nazali na yango. Oh, nayebi koloba! Nazali *boye* na *boye* to *boye*.’” Azalaki na ntina ya biloko wana te!

²³⁴ Nyonso esengelaki na ye, alobaki: “Natii elikia na ngai na Nzambe pe ngai wana nakei.” Yango mpenza. Pe engambe yango akitisamaki. Ya solo.

²³⁵ Yango nde tosengeli na yango lelo, ndeko. Lelo, tosengeli na bato lokola Dawidi, kobikela makambo ya université te.

²³⁶ Ezalaki elenge Mika, elenge Mika, mwana ya Imla, mobola, aboyámá, babenganaki ye na bibongiseli nyonso mpo na bosembo na ye mpo na Nzambe. Kasi mokolo moko, moto na Nzambe moko ayaki, nkombo na ye Yosafata, pe kuna, alobaki: “Nalingi koyeba Liloba na Nzambe ya solo.”

²³⁷ Saulo alobaki: “Nazali na bango nkama minei ya malamukoleka.” Alobaki: “Bango nyonso bazua ba-diplome, bango nyonso bayékólá awa na eteyelo.” Alobaki: “Ee, bazali batei ya malamukoleka, baoyo oyóká naino te.” Alobaki: “Nakoyeisa bango awa pe tokoluka elongi na Yahwe mpo na yo.”

²³⁸ Kasi na sima abimaki wana pe atáláki zinga-zinga, Yosafata alobaki: “Iyo, nayoki moto oyo koloba *boye*, pe nayoki moto mosusu koloba yango, kasi,” alobaki, “ozali na mosusu? Ozali na mosusu te?”

²³⁹ Nzambe alingaki kopesa nsango moko na motema ya sembo oyo. Ezalaki bobele na moto moko wana, kasi Nzambe azali na moto mpo na moto yango moko. Amen. Soki motema ya sembo ezali bobele moko, esika moko, Nzambe azali na moto moko mpo na ye. Yosafata azalaki moto ya solo-solo, mokonzi-oyo-abangaka-Nzambe, pe azalaki na lisosoli ya koyeba ete masakoli na bango ezalaki lokuta. Ayebaki ete ekesanaki na Liloba, amen (Oh, Ndeko Neville!), Yosafata ayebaki yango.

²⁴⁰ Alobaki: “Ee, na—natali na búku mobimba, makomi oyo ezali awa na seminaire, namoni bango nyonso oyo bazali awa.” Alobaki: “Ee, botala awa, oyo azali na . . . ee, botala ba-diplome azali na yango. Botala oyo wana,” alobaki, “botala—botala ba-diplome azali na yango. Botala Sidikiya awa, ye nde mokonzi na yango nyonso. Ee, azali episkopo, azali likolo na biso nyonso. Na ntembe te okondima maloba na ye!”

Yosafata alobaki: “Iyo,” alobaki, “na—na—na . . .”

241 “Ee, tala, tala, bango nyonso bazali na boyokani na ye. Bango nyonso bazali liboke moko monene! Pe okoki koloba te ete bazali Baebele te. Okoki koloba te ete bazali basakoli te, botala, ba-diplome ezali kotalisa yango polele.”

242 Yosafata alobaki: “Iyo, na—na—nayebi, Akaba.” Alobaki: “Ete ezali mabe te, kasi . . .”

243 Alobaki: “Nini ozali . . . Ndenge nini ozali kotuna ngai soki mosusu azali? Eteyelo na ngai mobimba yango oyo! Oyo nde bibongiseli nyonso elongo.”

244 “Kasi ozali te na moto moko oyo azali moto na etonga oyo te? Ata moko azali te, esika moko?”

245 “Ee, akozala ndenge nini? Azali na ye moyinga atángá te! Ee, moto ya ndenge wana okosala na ye nini?”

246 “Kasi—kasi nazali se kotuna yo, mosusu azali te, esika moko?”

247 “Oh,” alobaki, “iyo, moto ya ndenge wana azali.” (Kuna, oh, matondi na Nzambe mpo na yango!) “Moto ya ndenge wana azali, kasi,” alobaki, “nalingaka ye te. Bango nyonso pe balingaka ye te.” Alobaki: “Tobengáná, pe babengáná ye na bibongiseli wana, bango nyonso.” Alobaki: “Ayaki awa mpo na kosalisa liyangani, tobenganaki ye libanda na engumba. Iyo, misie. Tozali na ntina na ye te. Ee,” alobaki, “azángá nguya, pe autá mpenza na libota ya babola. Elobeli na ye ezali mabe mpenza.” (Ah-ha, lokola Moody, boyebi.) “Iyo, elobeli na ye ezali mabe mpenza.” Pe alobaki: “Ya solo, mpo na bato na likindo, azali moto na elobeli mabe koleka. Nayóká naino eloko lokola ye te. Oh, abukaka mpenza mimesano na bango. Ee, ye moto abukaki na biteni Endimeli ya Bantóma na bango. Nayóká naino eloko ya ndenge wana te! Oh, abukaka yango mpenza, pe balingaka ye te, ngai pe nalingaka ye te, bato nyonso balingaka ye te.”

248 “Oh,” Yosafata alobaki, “mokonzi áloba bongo te, kasi nakosepela koyoka ye.” Ayebi eloko Elisa alingaki koloba! Ayebaki yango.

249 Nzambe atikaki pembeni batei minene nyonso ya minene, ya makasi pe ya mayele, pe atiaki nsango na Ye kati na moto moke oyo alobaki ayebi eloko moko te. Kasi asalaki nini?

250 Balekisaki ye na komekama, pe balobaki: “Sikawa, loba likambo moko oyo bango balobaki.”

Alobaki: “Nakoloba likambo Nzambe akotia na monoko na ngai, esili.”

251 Alobaki: “Soki olingi kokóma na makasi sikawa, yeba ete ozali se . . . ozali—ozali lokola libanda na molongo awa, elenge. Kobosana te, basili kobengana yo na ebongiseli wana. Bakoki

lisusu kozongisa yon a bondeko soki oyokani na bango na ntango ya mpasi lokola oyo. Bisu nyonso tozali komilengela mpo na kosalisa campagne ya monene,” alobaki, “soki okoki kondima likambo na ngai.”

²⁵² Alobaki: “Nakoloba bobele likambo Nzambe alobi!” Kosala boyokani, okanisi ete okoki kosala boyokani ná moto na Nzambe mpo na Liloba na Nzambe? Te, misie, ekosalema te.

²⁵³ Alobaki: “Kasi ozali na bolembu. Ozali moto ya libota ya babola. Ee, oyebi likambo, bakoki . . .”

“Likambo bakosala etali ngai te.”

²⁵⁴ “Ee, bakobanda komema yo na mpepo longwa na ekólo moko kino ekólo mosusu. Bakosala nyonso, omoni, soki yo—soki bobele yo . . .”

²⁵⁵ “Te, te. nakoloba bobele makambo Nzambe akotia na monoko na ngai.” Nzambe atikaki bato nyonso wana pembeni, (iyo, misie, bosembo na ye nde esalaki yango) atikaki pembeni bato nkama minei pe apesaki ye YANGO ELOBI NKOLO!

²⁵⁶ Bongo, bandimaki Yango? Te, misie! Balobaki: “Yango ezali YANGO ELOBI NKOLO te, seminaire na biso eteyaka makambo ya ndenge wana te. Ee, tala Episkopo na biso, asíláki koloba liloba, akomaki milúlú. Bisu nyonso tosangani elongo, tosílísá biteyelo na biso. Nzambe azali na biso! Nzela nini Nzambe abimaki kotika biso ntango Akendaki epai na yo?”

Alobaki: “Okomona, na ntango moko.” Ah-ha, ya solo.

²⁵⁷ Azalaki ndenge nini? Azalaki na bolembu, kasi alekaki bango nyonso na makasi. Mpo na nini? Mpo azalaki na Liloba na Yahwe. Oh, ndeko, bokeseni nini ezali mpo na . . . eloko mosusu ntango nyonso oyo ozali na YANGO ELOBI NKOLO?

²⁵⁸ “He, Ndeko Branham, soki osali boyokani na likambo ya libatizi na Nkombo na Yesu, ee, tokobongisa likita monene na Chicago to bisika ya ndenge wana.” Ha! Bokanisi bokosala yango? Ata bosangani wapi, ata bozali kosala likambo nini, ndeko, bótíkala na YANGO ELOBI NKOLO.

²⁵⁹ Nalingi bato mosusu kati na bango baya koyebisa ngai, esika Libunga ezali. Bólakisa ngai kati na Liloba na Nzambe, esika Libunga ezali. Iyo. Bakoloba yango te. Te, misie. Kasi ezali YANGO ELOBI NKOLO! Bókangama na Yango, soki bango nyonso babengani bino. Ata okómi na bolembu ndenge nini: “Ntango wana nde nakómaka makasi.” Soki babengani ngai, Nzambe akokotisa ngai. Ah-ha, iyo. Nzambe. . . Soki babengani yo, Nzambe akokotisa yo.

²⁶⁰ Bómikanisela, Nzambe alokotaka ntango nyonso batiolami, bato mpamba. Na sima Akómisaka bango *bato minene* mpo na Ye. Tokoki kozanga koyeba yango na bomoi oyo, kasi ekoyebana na oyo ekoya; bomoni, ezali yango.

261 Pe Apesaki ye YANGO ELOBI NKOLO, mpo na nini? Akangamaki na Liloba. Azalaki na Nsango ya solosolo. Nzambe apesaki ye emononeli. Bamosusu bazuaki emononeli te. Bomoni? Ye azalaki na emononeli. Mpo na nini? Mpo akangamaki na Liloba. Kuna nde tomonaka bilembo ná bikamwa. Mpo ete . . . Bamosusu bazali komeka kosala lokola Yango, kasi ye akangamaki na Liloba. Sikawa tosala noki.

262 Eliya, ezali ntango lingomba na ye ebenganaki ye pe etikaki ye mpo na mokili ya eleko wana. Nakanisi Eliya anyokolaki bango mingi mpenza. Bomoni bongo te? Boyebi ndenge Eliya azalaki. Nabanzi, na ebandeli ya mosala na ye, atelemaki wana pe alobaki: “Ee, bino basi bozali koluka kozala lokola Mwasi Mokonzi,” bikoti ya kolata, boyebi, “Miss Yezabele! Bino basi ya mikolo oyo, bokómi lokola Mwasi Mokonzi, kolata lokola ye, kosala makambo lokola ye. Bino batei!” Oh! la la! Anyokolaki bango mpenza! Bazalaki kokoba kokweya kino ete moto moko te atikalaki.

263 Asengelaki kokóma na suka ya mobembo na ye. Moto moko te alingaki lisusu koyokana na ye. Lingomba moko te elingaki lisusu koyokana na ye. Bato nyonso ya lingomba na ye batikaki ye, bazongaki na mokili (ezali pe ndenge moko lelo), ya solo, bazongaki na mokili. Etikalaki bobele bato moko mpenza, moko awa pe moko kuna, bazalaki kouta mosika, na ekólo mobimba mpo na komona ye, pe bongo na bongo. Akómaki na esika moko ya mpasi mpenza, mayele na ye ekómaki na suka.

264 Alobaki: “Yahwe, natelemaki ngwi na Liloba na Yo, nalobaki Solo. Kasi bango nyonso bakei mosika, moto moko te atikali awa. Nazangi, nazangi ata moto ya koteya.” Amen. “Iyo, natelemaki ngwi na Liloba na Yo, Yahwe, pe sikawa tala esika nakómi, ata moto moko te alingi koyamba ngai. Soki nakei na engumba, bazali koloba: “Tala mobange ya libómá yango. Iyo, iyo, tala mobange ya libómá yango azali koya na engumba, sikawa akobanda koloba—koloba bilobela na ntina na bomoi ya mikolo oyo pe nyonso wana.”

265 “Bóyamba ye te! Mokengeli, koyokana ná moto wana te! Te, misie!”

266 Mokengeli: “Sikawa mobange ya bilandálanda wana ayei lisusu na engumba. Bomoni, Eliya wana, mobange wana ya libandi. Bólanda makambo ya mobange yango te. Bótala ye, alataka ata lokola bakonzi ya mangomba te, bilamba ya banganganzambe lokola ngai (ekoti na ye, boyebi; pe atelemi liboso, ná nzambala na mokongo, boyebi).” Alobaki: “Ye. . .” Alobaki: “A—a—a—azali moto ya lolenge moko. . . A—azali moto-ya-lolenge-mosusu.”

267 Pe nabanzi bato minene mosusu wana balobaki: “Boyebi? A—azali na mwa libómá. Ah-ha, iyo, a—azali na mwa libómá, afandaka kuna na lisobe, afandaka ntango mingi na zamba,

ayáká amizingi na eteni ya poso ya mpate. Oh! la la! Na sima apámelaka basi wana! Namóná naino likambo ya boye te. Bómeka te...bó—bó—bómeka kolanda ye, ata moke te! Bóyokana na ye te!”

²⁶⁸ Ee, lisanga ya batei bayanganaki, boyebi, balobaki: “Bino—bino nyonso bómeka ko...Bótika ye moko, sukasuka ako... akókoma na suka ya mayele na ye. Bótika ye—bótika ye kogánga kino bongó ekobima ye. Esili, bótika ye.”

²⁶⁹ Kasi mobange Eliya, akobaki kotambola sembo ná Nzambe, (Oh! la la!) akangamaki na Liloba. Bazalaki na liyangani moko moke kuna, abwakaki miso na eyanganelo, alobaki: “Bino ba-Yezabele nyonso!”

²⁷⁰ “Oh, abángaka likambo te! Nakokende lisusu koyoka moto wana te! Te, misie, nakomeka ata moke te!”

²⁷¹ Yango etelemisaki ye te, akangamaki na yango ndenge moko. Ntango abungisaki lingomba na ye, ntango abungisaki... bibongiseli nyonso etelemelaki ye, ezali ntango wana (ntango akómaki na bolembu) nde alobaki: “Natikali bobele ngai moko, pe bazali koluka koboma ngai.” Alobaki: “Bakoki kobeta ngai masasi soki bazui libaku yango.” Ah-ha. Bomoni? Kasi ngai... Bazali koluka bomoi na ngai. Pe natikali bobele ngai moko, Yahwe, násala nini?”

²⁷² Na ntango wana nde, ntango akómaki na bolembu (ata azalaki sembo, atatulaki bolembu na ye pe nyonso wana), nde Nzambe alobaki: “Yaka likolo na ngomba, Nakopesa yo nsango ya sika. Nakotinda yo sikawa na nsango ya sika. Nasilaki koyebisa yo: ‘Kende kopámela makambo oyo, sikawa Nakotinda yo lisusu kuna ná eloko moko mpo na kotalisa ete Ezalaki solo.’” Alobaki: “Osali mosala malamú, Eliya. Olobeli bango likambo ya Mwasi Mokonzi, pe nyonso wana, pe ndenge basalaki. Opámelaki Akaba ná makambo ya mpamba na ye nyonso ya mikolo oyo ná mangomba nyonso ya mikolo oyo, pe totalisaki batei wana esika na bango. Ozalaki ndakisa. Ozalaki wana na lisungi moko te, ebongiseli moko te, eloko moko te sima na yo, kasi okangamaki na Liloba na Ngai. Sikawa Nakopesa yo eloko moko. Kende kuna pe yebisa mokosi wana: ‘YANGO ELOBI NKOLO! Ata mamwe ekokita te, longwa na Likolo, kino mokolo ngai nakobengisa yango.’” Oh! la la! la la! Amemaki ye likolo na ngomba mpo na kolakisa ye eloko moko!

²⁷³ Oh, nakoki komona ye na ntongo wana, koya, kotambola na nzela ya Samalia. Na miso boye, azalaki mpenza kitoko te, ya solo, libandi na ye ezalaki kongenga na moi, suki pe mandefu ya pembe ezalaki kokita na elongi na ye, ná eteni ya poso ya mpate. Biblia elobi ete azalaki na “suki mingi”, suki nzoto mobimba, nakanisi, ezalaki kitoko te kotala ye na elongi; azalaki na mwa língénda ya kala na loboko, ná miso mike kotálá likolo, azalaki kotambola na nzela. Pe bino...ye...ye...

nabanzi azalaki kosala makambo lokola mwana ya mibu zomi na motoba, kasi azalaki na mibu ntuku mwambe. Ye wana azali koya, kotambola na nzela, semba kino na Samalia. Ndeko, autaki kopesamela makasi, sima na bolembu na ye: “Makasi na Ngai ekoki. Komitungisa te mpo na bibongiseli, Eliya. Komitungisa te mpo na yango, makasi na Ngai ezali nyonso osengeli na yango.”

274 Nazali kokanisa mokolo moko wana nazalaki pembeni na tempelo moko ya monene, pe nalobaki: “Nkolo, nalingaka te ete bango báya na—na bureau na ngai.”

Alobaki: “Ngai nde Eteni na yo. Bomoni? Ngai nde Eteni na yo.”

275 “Na—na bolembu nde Ngai—Ngai nazalaka... Makasi na Ngai ezali makasi. Mokano ebongi be na Ngai esalemaka (Polo, to Eliya, ata ozali nani) ntango omílongolaka na nzela.” Bomoni? “Na bolembu na yo, nde Ngai nakómaka makasi. Ezali nde Ngai! Ngai nde Moto Makasi oyo akotaka pe atondisaka.”

276 Nakoki komona ye kokita na nzela wana ya Samalia, miso mike na ye ya mobange ezali kotala *boye*, baninga, elongi na ye lokola moto azali koseka. Ndeko, ayaki mbala moko liboso ya Akaba. Abetaki monoko ata moke te, atatabanaki ata moke te. Te, te! Eloko ezalaki kobeta na nse ya ntólo moke ya loposo wana, ezalaki motema oyo Molimo Mosantu azalaki kofanda na kati. Iyo, ya solo mpenza! Ayaki, kotambola na nzela, abelemaki semba kino liboso na Akaba, pe alobaki: “Ata mamwe ekokweya te kino ngai nakobengisa yango.”

277 Atutaki makolo na nse, abalukaki, pe azongaki na biliki. Alobaki: “Osali mosala malamú, Eliya. Matá awa, Napesi mitindo na biyanganga nyonso ete báleisa yo sikawa, pe ba... pe fanda na yo awa mwa moke.” Oh! la la!

278 Ntango azalaki na bolembu nde akómaki makasi. Iyo, misie. Aningisaki likolo mpo mbula ébeta te. Ntango wana nde akómaki makasi, ntango abungisaki lingomba na ye, abungisaki biloko nyonso azalaki na yango, pe nyonso mosusu. Kasi akangamaki na Liloba na Nzambe, ntango wana nde azaláki na nguya ya kokanga likolo.

279 Ntango Yakobo abungisaki makasi na ye nyonso, ntango wana nde Nzambe apesaki ye nguya ya kokóma mwana mokonzi. Bomoni?

280 Ntango Polo abungisaki mayele na ye ya kelasi pe likindo na ye nyonso, Nzambe akómisaki ye ntoma mpo na Mabota.

281 Ntango Mose abungisaki makoki na ye nyonso pe akómaki na bolembu, Nzambe apesaki ye nguya pe atindaki ye na Ezipito na nguya ya Molimo, na mibu ntuku mwambe; mandefu na elongi, mwasi na ye likolo na mbalata-mpunda ná mwana na loketo, pe lingenda na loboko, akendeki pe alongaki Ezipito. Iyo. Bomoni?

Azalaki na mampinga sima na ye te, ndenge alingáká kokende, kasi na nguya ya Molimo. Amen!

Ntango ozali na bolembu nde ozali na makasi.

²⁸² Azalaki kotambola na nzela wana, atatabanaki te, atengátengaki te, eloko moko te, akendeki semba kino liboso ya Akaba, pe alobaki: “Nazali na Liloba na Yahwe.”

Alobaki: “Yo nde ozali kotia mobulu na Yisalaele.”

²⁸³ Alobaki: “Yo nde ozali kotia mobulu na Yisalaele.” Iyo, misie. Oh, ndeko! Iyo, misie. “Bimisa banganzambe ya mayele ozali na bango awa, mpo toyeba nani azali Nzambe.” Yango mpenza. “Tómata na Ngomba Karmel, tika ete Nzambe oyo ayanolaki na Pantekote áyanola lisusu. Tótala soki Nzambe azali bobele Nzambe yango moko, soki Yesu azali motindo moko lobi, lelo pe libela.” Akitaki longwa na ngomba, azalaki na Nsango moko. Iyo. Liboso, azalaki na bolembu mingi, abungisaki biloko nyonso liboso ya kosala yango. Asengelaki kozala na bolembu liboso ya kokóma makasi.

²⁸⁴ Bopète ya Nsango Malamu nde ebetisaka bato libaku. Balukaka kokómisa Yango eloko mosusu ya monene pe ya mayele mingi, ntango oyo ezali na bopète. Kasi Nzambe azuaka bisalelo mpenza ya komikitisa, ya bolembu pe ya bopète, mpo na kosala na yango misala na Ye. Ezali bobele esalelo na loboko ya Nzambe.

²⁸⁵ Yoane Mobatisi, Nsango na ye, moto-oyo-ayaki-liboso na Klisto, ezalaki na komikitisa mingi kino Elekaki likolo na mitó ya bato. Bóyoka naino. (Nakanisi nazali koumisa bino te, bino baoyo botelemi pembeni na bitutu, bomoni.) Bótala! Yoane, ntango. . . Basakoli nyonso batatolaki mpo na boyei ya Masiya. Moko na bango alobaki ete “Bangomba ekopumbwa lokola bana mpate ya mike.” Bamosusu balobaki: “Nkasa ekobeta maboko.” Moko alobaki: “Mabwakú nyonso ekomatisama, pe ba-ngomba ekokitisama.” Oh! la la! Mokolo nini oyo!

²⁸⁶ Bosílá kokanisa likolo na Biteyelo ya Basakoli pe makanisi ya bato na mayele mpo na yango? Oh! la la, bakómisaki makambo nyonso lokola makambo ya kelasi! Kasi ntango ekokisamaki, motei moko autaki na biliki, atángaki kelasi ata moke te na bomoi na ye, ntango mosusu elobeli na ye ezalaki mabe. Tata na ye azalaki nganganzambe, kasi Nzambe amemaki ye mosika na yango. (Tomonaki yango na eteyelo ya lomingo eleki.) Alingaki te kotika ye komisangisa ná bibongiseli wana, pe amemaki ye na biliki mpo na kolakisa ye makambo Ye moko. Bato ya ndenge—bato ya ndenge wana nde bakangamaka na Liloba na Nzambe.

²⁸⁷ Abimaki na biliki, pene na mibu ntuku misato; nakanisi ete mandefu ya moindo ezingaki elongi na ye, elingama-lingama; amizingaki na eteni monene ya poso ya mpate; atelemaki na potopoto, kino na mabólongo na ye; alobaki: “Ezali ngai nde

mosakoli Yisaya alobelaki.” Pe bato ya bibongiseli bayaki wana; alobaki: “Bókanisa te koloba kati na bino: ‘Tozali na *boye* na *boye*,’ Nzambe azali na makoki ya kobimisa, na mabanga oyo, bana mpo na Abalayama!” Oh! la la! Mpo na nini? Azalaki na YANGO ELOBI NKOLO! Azalaki na Nsango. Nzambe alobaki liboso ete ye akoya. Pe ntina oyo. . . Ayaki na komikitisa mingi kino Elekaki likolo ya mitó na bango.

²⁸⁸ Ntango Yesu ayaki, Alobaki: “Bokendeki komona nini, molobeli ya mayele mingi oyo akoki kolongwa na ba-Methodiste pe kokóma mo-Batiste, sima kolongwa mo-Batiste pe kokóma mo-Presbiterien, kolongwa mo-Presbiterien pe kokóma mo-Pantekotiste, pe kolongwa mo-Pantekotiste mpo na kokóma eloko mosusu? Bokendeki komona mokékélé oyo eningisamaka na mopepe nyonso? Yoane te!” Alobaki: “Bokendeki komona moto oyo alati bilamba ya kitoko?” Alobaki: “Bazalaka na bandako ya bakonzi, lolenge wana ya batei.” Alobaki: “Bokendeki komona nini, mosakoli?” Alobaki: “Koleka mosakoli!”

²⁸⁹ Yoane azalaki koleka mosakoli. Pe, bótala, ayaki na komikitisa koleka bango nyonso. Kasi azalaki koleka mosakoli. Boyebi nani Yoane azalaki? Azalaki motindami ya boyokani. Ya solo, mpenza. Akendeki mosika koleka mosakoli. *Mosakoli* azali momóni oyo amonaka makambo. Yoane pe asalaki yango, kasi azalaki mosika koleka yango. Azalaki motindami ya boyokani. Alobaki: “Iyo, botala ye oyo elobamaki ete ‘Nakotinda Motindami na ngai liboso na elongi na Yo.’” Yango nde oyo ye azalaki, azalaki motindami ya boyokani. Ya solo. Lolenge ya koya na ye na bopètè, ezipaki miso ya bato na mayele.

²⁹⁰ Sikawa tosengeli kosilisa, etikali moke, sima na miníti moke, nazali na makambo mosusu awa nalingi koloba, biteni ya Makomi ná makambo mosusu oyo nakomaki.

²⁹¹ Ezali boni likambo ya mwasi-akufelá-mobali ná mwa faríni? Akómaki na bolembu na ye, ntango mosusu amibomaki na nzala. Azalaki na faríni te. Akokaki kokende esika mosusu te mpo na kodéfa faríni, moto moko te azalaki na yango. Kasi akómaki esika moko, mondimi monene, mobali na ye azaláká moto monene ya Nzambe. Kasi azalaki mwasi-akufelá-mobali, ná mwana. Pe azalaki bobele na ndambo ya faríni, kasi ekokaki, yango nde nyonso asengelaki na yango; atikaki yango na maboko ya Nzambe, abikaki na yango mibu misato na sanza misato, mwa ndambo ya faríni. Akómaki na bolembu.

²⁹² Abimaki na ntongo wana mpo na kolokota nkoni mibale, kobuka yango pe kotia yango esika moko. Bomoni, nkoni mibale yango ezali Ekulusu. Bomoni? Kobuka. . . Alobaki: “Nakolokota nkoni mibale.” Alobaki ata moke te: “Nakolokota nkoni mingi,” kasi, bobele nkoni mibale. Ezali yango. Bomoni elílingí?

²⁹³ Pe, iyo, lolenge ya kala. . . Lolenge ya kopelisa móto lelo, ezali kozua nkóni, kokutanisa yango pe kopelisa na katikati.

Ntango nakendaka na zamba, ngai. . . na ba-ngomba, na butu, mpo na kobatelama na malili, natiaka lonkoni moko *boye* pe lonkoni mosusu *boye*, pe na butu, nakopusa bobele songe ya nkoni, pe móto ezali kongala wana ozali kolekisa yango, bomoni, katikati na ekulusu.

²⁹⁴ “Nazali na nkoni mibale. Nakolámba lípa, nakolámba faríni oyo, mwa faríni moke oyo, pe nakosala gateau mpo na ngai ná mwana na ngai. Tokolia yango pe tokokufa.” Akómaki mpenza na bolembu, boye te? Alobaki. . . Abalukaki pe abandaki kozonga. Oh, ezalaki mokolo ya moi makasi! Oh, eleki ntango molai mingi, pe azuaki eloko te. Nyonso. . . Mai te, pe bato bazalaki kogánga, bato bazalaki kokufa, bisika nyonso; esika moko te ya kodefá, eloko moko te ya kosala. Akómaki na suka ya nzela. Ekómaki ntango na ye ya bolembu. Alobaki: “Nakolámba yango mpo na ngai ná mwana na ngai, na sima tokolia yango pe tokokufa.” Bongo abalukaki pe alobaki. . .

²⁹⁵ “Zela moke!” Atalaki na sima. Pe elongi ya mobange moko na suki elíngámá ekotaki na ekuke ya lopango, alobaki: “Kende kolámbela ngai gateau liboso, pe memela ngai yango.” Oh! “Yélá ngai ndambo ya mai na loboko na yo, ná eteni ya lípa, mpamba te, YANGO ELOBI NKOLO!” Oh! la la! Yango nde esukisaki likambo. Oh! la la! Mwa ndambo oyo azalaki na yango, bomoni, atikaki yango na maboko na Nzambe. Ekokaki mpenza mpo na koleisa ye na ntango etikalaki. Iyo. Bomoni, ntango azalaki na bolembu nde azalaki na makasi.

²⁹⁶ Mosusu azalaki bobele na mwa mafuta na mbeki. Pe azalaki na eloko moko te, bana na ye mibale ya mibali balingaki kotekama lokola baumbu. Azalaki na eloko mosusu te ya kosala na mwa mbeki ya mafuta wana. Ezalaki mingi te, akómaki na suka.

Eliya alobaki na ye, alobaki: “Ozali na eloko nini na ndako na yo?”

Alobaki: “Bobele mwa mafuta na mbeki.”

Alobaki: “Kende epai na bazalani na yo kodefá ba-mbeki mingi.”

²⁹⁷ Wana, botala, komilengela liboso likambo ésalema. Bomilengela! Dawidi ayokaki mongongo wana kati na nzete mike ya baka. Elisa amonaki lipata ya moke lokola loboko, alobaki: “Nayoki lokito ya mbula makasi.” Soki Nzambe akoki bobele kozua ba-mbeki ya polele! Ya solo.

Alobaki: “Tondisa yango na ndako mobimba.” Amen!

²⁹⁸ Bomoni likambo Nzambe alingaka? Nzambe asengeli kozala na ba-mbeki ya polele. Boyoka! Tozuáki malakisi mingi, bolémá mingi ya mangomba, kino tokiti mpenza na nse ya mbeki. Etikali bobele eloko moko, kozongela Nzambe ná Liloba na Ye. Pe soki bosali yango, bómema ba-mbeki ya polele. Bóbimisa

biloko nyonso ya ba-Methodiste libanda na bango, nyonso ya ba-Pantekotiste libanda na bango, pe nyonso ya ba-Batiste libanda na bango, mpo na kozala ba-mbeki, pe kotia bango na ndako. Na sima bózua longwa na Mbeki oyo pe bóbanda kosopa, amen, bóbanda se kosopa.

²⁹⁹ Azalaki na mpenza na makoki ya komisunga ye ná bana na ye, pe nyonso wana, pe kofuta nyongo nyonso. Mpo na nini? Mpo na nini? Mwa moke oyo azalaki na yango, atikaki yango na maboko na Nzambe, pe alandaki maloba ya mosakoli yango, asukaki malamú.

³⁰⁰ Nzambe, tindela biso mosakoli oyo akozua Liloba na Nzambe, oyo akozua *eloko mosusu* te, bobele komema ba-mbeki ya polele. Soki Nzambe akoki kozua ba-mbeki ya polele, na sima akozua Liloba na Nzambe mpo na kosopa Yango kati na moto.

³⁰¹ Ezali te baoyo balobaka: “Oh, nalengaki ntango nazuaki Yango. Nalobaki minoko ya sika ntango nazuaki Yango. Nabinaki na Molimo.” Bóbosana yango, omoni, bóbosana yango!

³⁰² Bozela se wana kino Ekoya, esili, kino ete mbeki ekotónda. Ya solo. Basalaka nde bongo. Iyo, misie, na komikitisa na Yango! “Ba-mbeki etóndisamaki,” tokoki kotelema naino wana!

³⁰³ Mokolo moko, bayekoli bamitungisaki mingi, Yesu alobaki na bango, Alobaki: “Bato nkoto mitano bazali awa,” pe Alobaki, “bazali kokweya sénza, bazali na nzala.” Oh, nakokaki kotelema wana ngonga mobimba. “Bato nkoto mitano bazalaki na nzala,” bato milio na milio na milio monkama bazali na nzala!

Balobaki: “Zongisa bango na ba-ndako.”

Alobaki: “Esengeli kosala bongo te.” Alobaki: “Bino bóleisa bango.”

³⁰⁴ Oh! la la! Nakoki kokanisa ndenge bazalaki kokongola biloko nyonso bazalaki komona, pe boyebi, ntango bakongolaki nyonso (biloko nyonso) oyo. . . Bólimbisa liloba oyo: “kokongola.” Kasi ntango bazuaki biloko nyonso, balobaki: “Sikawa, tala, toluki na moláko mobimba. Tozui ata loméyá moko te, na bongo tokoki kopalanganisa nsango malamú te.” Bomoní? “Na bongo, toluki biloko nyonso oyo ezali awa, kasi eloko bobele moko tozui, ezali bobele biteni ya mápa mitano ná ya mbisi mibale oyo euti na mwana moko” lokola Dawidi, ndenge autaki kuna na lisobe. “Yango nde nyonso tozali na yango. Yango nde nyonso tozui. Tokomi na suka na biso. Tokoki lisusu kosala eloko mosusu te, Yoane.” Petelo alobaki: “Yango nde nyonso tokoki kosala. Yango nde nyonso tokoki kosala. Tokomi na suka na biso. Bobele yango nde eloko ya kolia oyo tozali na yango.”

³⁰⁵ Ee, nakoki kozua bobele Likomi moko ya moke, Misala 2:38, pe yango nde nyonso tosengeli na yango, kotosa Yango. Esengeli na bino te kokende na ba-seminaire, mpo na koyekola

makambo *boye* na *boye* to *boye*, kozua bobele Yango. Iyo, bózua bobele—bobele Yango, yango nde nyonso bosengeli na yango: “Bóbongola mitema, moko moko na bino, pe bózua libatishi na Nkombo na Yesu Klisto mpo na bolimbisi ya masumu na bino, pe bokotondisama na Mafuta.” Bomoni? Bótíkala polele, bómilengela mpo na Oyo wana, yango nde nyonso bosengeli na yango. Bótia bobele litangá moko kati na yango, pe bótala yango kotondisama.

³⁰⁶ Boyebi, ezalaki mpenza mpasi te mpo na kokotisa litanga na mbeki moko na moko. Ntango mosusu atiaki mosapi na ye, *boye*, atangisi yango moko na moko ndenge wana; atalaki pe etondaki. Atangisaki yango lisusu, bomoni, yango nde nyonso esengelaki na ye kosala, mpo ezalaki mafuta epambolami.

³⁰⁷ Kozua kobikela makambo ya seminaire moko te. Zua nde Liloba na Nzambe pe tangisa Yango na kati, okomona ndenge ekotonda.

³⁰⁸ Alobaki: “Ee, litangá ya ndenge nini tosengeli kosala? Ntango mosusu tokoki kozua molongo moko na Nzembo.”

³⁰⁹ Bózua oyo naye bisi bino: “Bóbongola mitema, pe bózua libatishi na Nkombo na Yesu Klisto mpo na bolimbisi ya masumu, pe bokotondisama uta na Litangá yango.” Tangisa yango kuna na kati, pe okotondisama uta na Litangá yango. Yango nde Litangá oyo Petelo asalelaki Mokolo ya Pantekote. Yango nde Litangá oyo Polo asalelaki. Yango nde Litangá oyo bayekoli nyonso basalelaki. Oyo etikali ekobakisama, zua bobele Litangá wana pe landa yango kino na suka, pe oyo etikali ekozala malamau.

³¹⁰ Zalá na bolembu! Zalá polele! Tikálá mpenza polele, pe kobanda wana, ekokoba kotanga, pe Nzambe akobakisa kotangá oyo etikali. Yo sálá bobele bongo. Yo kweya na mabólongo pe yamba yango na motema na yo mobimba. Kotisa na motema na yo sikawa pe loba: “Nzambe, nandimi Yango, na motema na ngai mobimba!” Nzambe akotala likambo ya matangá oyo etikali, ekotondisama: “Okotondisama lisusu na Molimo Mosantu.”

³¹¹ Boye, bazalaki na biteni ya mápa mitano ná mbisi mibale. Bongo, balingaki kosala nini? Boye, bayaki koloba: “Oyo nde nyonso oyo tokongoli. Tokomi na suka na biso. Tokoki kozua eteni mosusu ya mápa esika moko te, ezali na moto moko te. Pe elenge mobali oyo, ntango mosusu, lokola etaliseli . . . akimaki kelasi, akendeki na eteyelo na ntongo, akimaki pe akendeki kolóbo mbisi awa. Pe tozuaki ye, kuna na mai, ayaki koyoka. Pe, kuna, azali na yango mitano.” Totondi Nzambe mpo na elenge mobali wana! Iyo, misie. Balobaki: “Biso . . . eloko moko tozali na yango mpo na bomoi ezali bobele mwa litangá oyo.” Balobaki . . .

³¹² Yesu alobaki: “Ekoki na yango. Boya na yango awa.” Bomoni? “Boya na yango awa, bopesa Ngai yango. Bopesa Ngai mwa litangá wana, oyo etikali ezali likambo na Ngai moko.

Sikawa, bóbanda kokabola, wana Nazali kopesa bino uta na eteni oyo.”

313 Pe moko na moko na bino ázua eteni ya Misala 2:38 na ntongo ya lelo, na motema, bandá bobele wana okomona ndenge Akobanda kobuka Lípa ya Bomoï mpo na yo. Yo bongola motema, zua libatisi na Nkombo na Yesu Klisto mpo na bolimbisi ya masumu na yo, na sima okomona soki Molimo Mosantu akotanga te kati na yo, Akokoba kotanga likolo na eloko *oyo* pe kotanga likolo na eloko oyo *kuna*, kotanga *awa*, kotanga *kuna*, kotanga *kuna*, pe ekozala kotondisama ya Molimo Mosantu! Ya solo!

314 Esengeli na yo te kokende na ba-seminaire. Osengeli na yo te kozala na mayele mingi. Eloko bobele moko osengeli kosala ezali ete koyeba ete oyebi eloko te. Tika Nzambe ásimba yo, Akotala makambo oyo etikali.

315 Malamu, na sima Mongongo elobaki: “Boya na yango awa.” Yango nde Nzambe alingi na ntongo oyo, komemela Ye ba-mbeki ya polele. Akotala makambo oyo etikali. Iyo, misie.

316 Mokufi miso Bartimé afandaki pembeni na ekuke, na bilamba epasúká, na malili, oh, ntango na ye ya bolembu koleka, ayokaki Mongongo moko koloba: “Boya na ye awa.” Ya solo, ntango mosusu ezali ntango na yo ya bolembu koleka.

317 Ezalaki Maria na nkunda, motema na ye etutamaki, babomaki mwana na ye, mwana na ye ya mobali, nyonso, elikia nyonso esilaki. Pe akendeiki kopakola Ye malási mpo ápola te, kasi nzoto na Ye ezalaki ata kuna te. Pe ayokaki mongongo koloba: “Ozali kolela mpo na nini, mwasi?”

318 Alobaki: “Bamemi Nkolo na ngai. Pe ngai. . .” Mawa mingi mpenza, ezalaki mwana na Ye oyo bautaki koyokisa nsoni; balongolaki bilamba na Ye nyonso pe batiaki Ye kuna na Ekulusu, pe babákaki Ye na ekulusu pe babetaki Ye nsete, sima na Ye kotatola ete Azalaki Masiya, wana ayebaki ete Molimo Mosantu nde azipaki ye mpo na kobota Mwana yango. Azalaki Mwana na Nzambe. Amonaki misala na Ye, pe nyonso, pe amonaki na ntango ya bolembu koleka mpenza. . .

319 Pe wana, Yesu atelemelaki mabe, atelemelaki bibongiseli wana, atelemelaki Bafalisai wana; pe akómaki na bolembu pe Amikabaki mpo na kufa, pe akufaki lokola mosumuki na Ekulusu, wana Amemaki masumu na biso. Ba-Nzembo mpenza, basakoli mpenza oyo bango bazalaki kondimela, basilaki koloba (mibu nkama na nkama liboso) Maloba mpenza oyo Ye alobaki na Kalvari, kasi basosolaki yango te. Bato minene ya lingo- . . .

320 “Nzambe na ngai,” Dawidi alobaki, “Nzambe na ngai, mpo na nini Otiki ngai?” Nzembo 22, “Mikuwa na ngai nyonso, bango bazali kotalatala ngai, ata moko na yango ebukani te. Baningisaki mito pe balobaki: ‘Atalelaki bamosusu. . . A-Abikisaki bamosusu, Ye moko Akoki komibikisa te.’” Pe nyonso

oyo basakoli basiláki koloba, ezalaki mpenza wana! Pe Yesu, ezalaki Ye kokufa, asimbaki Liloba yango, Amikabaki. Nzambe, Emanuele, akómaki na bolembu mingi kino Amikabaki na kufa, pe na nkunda, pe molimo na Ye na ewelo. Bolembu! Kasi longwa na komipesa mobimba wana. . . Asekwaki na ntongo wana ya Pasika, Amilukelaki nzela longwa na nse koleka.

³²¹ Azalaki na Likolo koleka, pe Akómaki na nse koleka. Ayaki epai na bato ya nse koleka, Akendeki na engumba ya nse koleka. Pe moto mokuse koleka na engumba yango asengelaki kokitisa miso mpo na komona Ye. Alongwaki wana kino kufa, pe longwa na kufa kino na nkunda, pe longwa na nkunda kino na ewelo; kino na nse koleka nyonso, na ewelo ya nse koleka nyonso moto akoki kokanisa, Akendeki kuna.

³²² Kasi na sima, longwa wana, Nzambe abandaki kotombola Ye. Alekaki Paradizo, kolongwa wana kino na nkunda, pe kolongwa nkunda kino na Nkembo, koleka Likolo mingi kino Asengeli kokitisa miso mpo na komona Lola. Anetolaki bangwende na Ye na Lola!

³²³ Mama yango ná motema oyo ezokisami, ayebaki likambo oyo te, atelemaki wana: “Bamemi Nkolo na ngai, pe nayebi esika yango te.” Azalaki. . . ezalaki ntango na ye ya bolembu koleka. Nkolo na—na ye alongolamaki. Babákáki Ye na ekulusu, ata Ye atikaki bango. . . babákáki Ye na ekulusu, na nsoni ya kotia Ye kuna likolo, bolumbu liboso na bato wana; pe batobolaki Ye mopanga na mopanzi, makila ezalaki kotanga, pe ayokaki Ye kogánga na Ekulusu, pe amonaki mabelé koningana, pe likolo nyonso eyebaki ete Akufaki. Bakitisaki Ye, nzoto ekangámá na mpio, pe batiaki Ye na nkunda. Amilobelaki: “Limemia ya suka nakoki kopesa na Mwana na ngai molingami ezali koya kopakola Ye malási mpo ápola te, kasi sikawa bamemi Ye.” Atelemaki wana pe azalaki kolela, elenge mama yango azalaki wana kolela, kolela na mongongo makasi. Oh, ezalaki ntango ya bolembu koleka!

“Ozali kolela mpo na nini, mwasi?” Mongongo moko elobaki sima na ye.

³²⁴ Akanisaki ezalaki sinzili ya nkunda, alobaki: “Oh, bamemi. . .” Akokaki ata kobaluka te, alembaki mingi. Alobaki: “Nalali te mikolo misato nyonso oyo, butu na moi. Nazalaki wana pe namonaki ndenge bazalaki kobáka Ye na ekulusu, namonaki Molingami na ngai moko oyo nayebi ete Azalaki Mwana na Nzambe. Nayebi Azalaki bongo! Kasi ba. . .” (Azalaki kotala ngámbo mosusu, pe Ye na sima.) “Bamemaki Ye pe babákaki Ye na ekulusu. Namonaki Ye kosekwisa bakufi longwa na nkunda. Namonaki Ye kosala bikamwa likolo na bikamwa. Pe nayebi ete Molimo Mosantu. . . Nzambe ayebi motema na ngai, nayebaki ata likambo moko te, pe Molimo Mosantu apesaki ngai Mwana yango kozanga koyeba mobali.

Nayebi mpenza ete ezalaki solo! Pe namonaki ndenge bayokisaki Ye nsoni pe. . . balongolaki bilamba na Ye, batombolaki Ye likolo pe babetaki Ye fimbo. Akufaki liwa ya somo koleka. Nalingi Ye, ata basalaki Ye nini. Nalingi mpenza kokunda Ye, nalingi—nalingi kokunda Ye na lolenge oyo esengeli, kasi bamemi Ye. Nalekisi mikolo mingi mpenza, motema na ngai ezokisami. Nazali bobele boye. Nayebi te eloko nini basali na Nkolo na ngai.”

³²⁵ Alobaki: “Maria.” Na sima akómaki na makasi. Amen! “Kende koyebisa bayekoli na Ngai ete Nakokutana na bango na Galilai.” Oh! la la!

³²⁶ Na kati na bolembu nde tokómisamaka makasi. Ntango ozali na bolembu, ezali ntango wana nde okómaka makasi.

³²⁷ Petelo, wana azalaki kolóbo mbisi, azalaki. . . mosala na ye ezalaki ya kolóbo mbisi. Nasepelaka na lolenge ya mosala na ye. Bongo, azalaki kuna kolóbo mbisi, alembaki mpenza nzoto, ayebaki ete awánganaki Klisto. Oh! la la! Ayokaki mosakoli yango ndenge kotelema wana pe koloba na ye: “Petelo, olobi ete olingaka Ngai?”

³²⁸ Alobaki: “E Nkolo, Oyebi ete nalingaka Yo.” Alobaki: “Nalingaka Yo. Nakoki ata kokufa mpo na Yo.”

³²⁹ Alobaki: “Petelo, okanisi likambo ozali koloba, kasi okowángana Ngai mbala misato liboso. . . Okowángana Ngai liboso na soso mobali kolela mbala ya misato. Omoni, okowángana Ngai mbala misato liboso soso élela.”

³³⁰ Bongo ntango amonaki likambo yango kokokisama, ezali ntango atelemaki wana pe alobaki: “Nayebi Ye te. Te, nayebi eloko moko te likolo na ba-Pantekotiste wana.”

³³¹ Ezali naino ntango ya kosilisa liteya te, ezali saa na ngai nde ezali na bokono. [Ngonga ya saa ya Ndeko Branham ebetaki—N.D.E.] Bomoni? Alobaki ete. . . Na—na—nayebi ete na—nasengeli kosukisa sikawa, kasi na—nakoki kosukisa sika-sikawa te, bomoni, na bongo nasengeli kosilisa yango awa sima na miníti moke.

³³² Alobaki: “Na—na—na—nayebi ete nawánganaki Ye. Nawánganaki Ye liboso na Pilate. Nawánganaki Ye liboso na mwasi oyo abelemaki na ngai pe alobaki: ‘Yo ozali moko na bango te?’ ‘Te!’ Pe nalápaki ata ndayi!” Oh, azalaki komitungisa mpenza. Alobaki: “Na—na—na. . .” Awánganaki. . . Awánganaki Ye. Pe amonaki Yesu kotelema pe kobwaka miso, na sima, ntango soso elelaki, abwakaki miso ngambo na Petelo. Abimaki. Oh, alembaki nzoto mpenza ye moko, alobaki: “Mpo na nini nazali kokoba kozala na bomoi?”

³³³ Na bongo, sima na yango, alobaki: “Nakanisi nakozongela kokende kolóbo mbisi. Nakoki lisusu koteya te, na bongo nakozongela kolóbo mbisi.” Abwakaki monyama na mai pe

asalaki yango butu mobimba, azuaki mbisi moko te. Pe akómaki na esika ya bolembu, azuaki eloko moko te, alembaki nzoto, akómaki na suka ya makoki na ye.

³³⁴ Ee, akanisaki ete azalaki moto monene, akataki litoi ya mwana ya nganganzambe mokonzi. Ee, akanisaki ete azalaki moto monene, boyebi, ayekolaki eloko moko. Kasi ayebaki eloko te! Asengelaki kobosana nyonso wana.

³³⁵ Pe azalaki wana, alobaki: “Ee, nayebi eloko moko, nazali molóbi mbisi. Nakoki kokoba kobika, na kolóbo mbisi.” Abwakaki monyama butu mobimba kasi azuaki eloko moko te. Oh, alembaki mpenza! Mbala nyonso azalaki kobenda yango, monyama ezalaki na eloko te. Pe alembaki mingi! Akómaki na ntango ya bolembu koleka, alobaki: “Nakoki ata komibwaka libanda na masuwa oyo. Nazali ata na ntina moko te sikawa.”

Alobaki: “Bana, bozali na mbisi?”

³³⁶ Abwakaki miso na libongo, pe moto moko atelemaki wana. Alobaki: “Te, tosali mosala makasi butu mobimba kasi tozui eloko moko te. Nakanisaki ete nazalaka molóbi mbisi.”

“Ezali nde yo, Simona?”

³³⁷ “Iyo. Ee, nasali mosala makasi butu mobimba kasi nazui eloko moko te. Oh, na—na . . . Tozali ata na mbisi moko te awa.”

Alobaki: “Ee, bwaka monyama na yo na ngámbo mosusu.”

³³⁸ “Tosilaki . . . Nini?” Bongo, akó- . . . Alobaki: “Na ngámbo mosusu? Tobwakaki yango mbala na mbala!”

“Bwaka yango na ngámbo mosusu.”

³³⁹ Abwakaki monyama na ye, pe abendaki. Alobaki . . . Bongo akómaki makasi. Oh! la la! Alokotaki noki kazáka na ye ya molóbi mbisi pe amizingaki na yango, alobaki: “Bandeke, Ezali Ye oyo Azali!” Pe alúkaki nkai na lombangu kino na libongo liboso na bato mosusu, balúkaki ba-bwato na bango na lombangu nyonso. Abetaki mai pe alekaki bango, ná kazáka na ye ya molóbi mbisi, akómaki na libongo. Mpo na nini? Ntango wana akomaki makasi. Ntango azalaki makasi akokaki kosala eloko moko te, kasi ntango akómaki na bolembu nde akómaki makasi. Iyo, misie.

³⁴⁰ Oh, mayele ya kosala ya Nzambe ezali kokomisa ba-mbeki ya bomoto polele pe kobimisa mokili na yango. (Sikawa, mwa ntango moke pe tokozonga.) Lokola na Pantekote, na Pantekote, Asalaki nini? Esengelaki na bango mikolo zomi mpo na kobimisa nyonso kati na bango. Kasi bango nyonso bazalaki kuna ná ba-mbeki na bango etálá likolo, pe Nzambe Amizuaki pe atondisaki bango. Esili! Bangingisaki mokili; Amisopaki kati na bango.

³⁴¹ Yango nde bosenga ya lelo. Yango nde tosengeli na yango lelo, ezali ba-mbeki ya polele, iyo, misie, mpo Nzambe ákoka kotondisa bango. Pe okoki kozua bango te . . . Nasengeli kotika

makambo mingi awa. Nzambe akoki kosalela bango te wana basili kotondisama. Soki otónda na mayele ya likindo, Nzambe akoki kosalela yo te. Nzambe asengeli kozua ba-mbeki ya polele mpo Ye ákoka kotondisa bango.

³⁴² Sikawa, Eliya alobaki te: “Kende kozua ba-mbeki, défá mafuta mingi, pe tokotala soki tokoki te koteka yango na ntalo malamumu, okozua mwa libonza pe okozala na makoki ya kofuta nyongo ya mozalani na yo ndenge wana.” Alobaki: “Zua bobele ba-mbeki ya *polele*. Yango nde nyonso osengeli na yango.”

³⁴³ Ezalaki nde bongo na Pantekote, bazalaki na ba-mbeki ya polele mpo Nzambe ákoka kotondisa yango. Ndeko, eleko oyo esengeli na yango. Eleko oyo; tosengeli kozua yango. To tozui yango, to tokufi. Nalingi kosilisa sikawa, boyoka. Tosengeli kozua yango to kokufa. Iyo, misie.

³⁴⁴ Ba-masíni minene ya mangomba oyo tozali na yango, ba-masíni ya mangomba minene ebébi nyonso, esili kozua ebótú ya molimo kati na yango. (Ndeko Collins azali esika moko awa, ná Ndeko Hickerson.) Nabanzi vilebrequin nde ebebi. Eloko moko etambolaki malamumu te. Bazali kosalela essence ya mabe, ebebi nyonso mpenza. Basalelaki kobikela makambo ya seminaire esika ya Molimo Mosantu.

³⁴⁵ Mayangani minene na biso ya kolamuka ya ekólo, bato minene na biso minene, mayangani na biso ya mabondeli ya babeli, ekwei nyonso. Toyebi ete ezali bongo. Bótala mopalangisi na biso ya lokumu, Billy Graham, atamboli na ekólo mobimba ngámbo na ngámbo, ngámbo na ngámbo, ngámbo na ngámbo. Epesi litómbe nini? Oral Roberts, mayangani ya mabondeli ya babeli bisika nyonso, pe ezali kokoba kobeba koleka ntango nyonso.

³⁴⁶ Mpo ezali nyonso ba-Batiste, ba-Presbiterien, ba-Assemblée de Dieu, bibongiseli nyonso mosusu oyo ya ndenge na ndenge, bazali kosangisa yango nyonso, ezali nini? Masíni monene ya mangomba, kasi Nzambe atondisi yango mpenza na carbone mpo na bino. Sikawa ekómi koluka péma, “tshum,” pum, pum, pum, “tshum,” pum, pum, pum, mwa moke awa mpe kuna. Esili mpo na yango! Ekómi na suka! Essence esili nye, bosopelaki yango mai. Nyonso esili (iyo, misie), ba-pneus etoboki na ngámbo nyonso mibale. Tozali na lolenge ya nsómo. Masíni ya mangomba esili kotelema.

³⁴⁷ Pe, bandeko, ezipelo ya lifelo esili kolongolama. Ya solo. Pe liziba ya nguya ya milimo mabe ezali kosopana bipai nyonso. Elóngi bikólo. Elóngi polítiki kino epolí kino na kati. Elóngi mangomba kino bayebi eloko mosusu te bobele ebongiseli.

Soki olobi: “Ozali Moklisto?”

“Nazali Metodiste.”

“Ozali Moklisto?”

“Nazali—nazali Pantekotiste.”

³⁴⁸ Ndenge nalobaki mokolo mosusu, ezali lisusu na ntina ata moke te, koleka kozala ngulu, to ngulúbe, to mpunda, to eloko mosusu. Ezali na litomba ata moke te na Yango. Ozali Moklisto soki obotámi mbala mibale pe otondisámi na Molimo Mosantu, liboso na yango te, pe omipési mobimba na Molimo. Soki omipési na Molimo te, na bongo obotámi mbala mibale te pe ozali na Molimo Mosantu te. Okoki koloba minoko na sika pe kolénga, kopumbwa pe kopota mbangu, pe kosala makambo ndenge na ndenge ya . . .

³⁴⁹ Polo alobaki: “Nakoki kolongola ngomba na kondima, nakoki kobikisa babeli, nakoki kozala na boyebi ya Biblia, nakoki kokende na seminaire mpo na koyekola makambo nyonso wana, pe bongo na bongo,” alobaki, “nazali bobele eloko mpamba!” Aleluya!

³⁵⁰ Oh! la la! okoloba likolo na kolongolama ya mofiníko ya mbilíka! Milimo mabe ezali kotambola zinga-zinga, ba-nguya ya zabolo, na nse ya nkombo ya Boklisto, “bazali koteya Malakisi ya mibeko ya bato,” malakisi ya likindo ya seminaire, bazali kotika Biblia pembeni.

³⁵¹ Aleluya! Nani azali na makoki, nani azali na makasi esengeli, nani azali na bwanya esengeli? Nani azali na nguya oyo ekoki ya kokonza limpinga-ya-badémon oyo, ezali kolongola bilamba ya basi na biso, na nkombo ya batei, ba-Methodiste, ba-Batiste, pe ata ba-Pantekotiste? Bazali kopakola bilongi na bango lokola Jezabele, kokata suki na bango, pe kolata ba-patalons lokola mibali. Batei na biso, bazangi makoki ya kotelema liboso na bango mpo na kolobela bango yango. Bakonzami na milimo mabe! Limpinga-ya-badémon nde elongolaki bilamba na ye nyonso. Molimo mabe nini oyo ezali konguluma?

³⁵² Nani azali na makasi esengeli? Ebongiseli ya—ya lolenge nini ezali na makoki ya kolonga ye oyo azali koleka-leka na ba-nkunda ya bibongiseli, kogánga: “Ntango ya bikamwa esili koleka, pe tosengele na Molimo Mosantu te”?

³⁵³ Nani akoki kokonza molimo mabe yango? Nzambe! Tokoki kolonga yango na ebongiseli te. Tokoki kosala yango te na makasi ya mangomba. Kasi mokolo moko Mongongo moko esalaki yango, amen, elongaki milimo mabe yango, ezongisaki bango na lisosoli ya malamumu pe elatisaki bango bilamba. Mongongo yango moko epesaki biso elaka: “Misala mizali Ngai kosala, bino pe bokosala yango.” Bokolonga ata moke te na essence ya mangomba kati na motuka etondi na carbone. Bokolonga ata moke te na ebongiseli. Bokosala yango soki botikali mpamba pe bokómi na bolembu, bobimisi nyonso oyo ezali kati na bino, pe botiki Molimo Mosantu kokota pe koningisa binama na bino

nyonso, pe kotondisa mofiniko nyonso ya nzoto na bino. Yango moko nde . . . kosala yango. Tosengeli na ebongiseli ya sika te.

³⁵⁴ Eloko tosengeli na yango, E Nzambe, nazali koyoka Ye kosopana zinga-zinga awa sikawa. Eloko tosengeli na yango ezali mosakoli ya Nzambe kotelema ná konguluma ya nkake ya Nzambe, mikalikali ya molimo, oyo ekoningisa mokili pe koyokisa yango nsoni! Aleluya! Azali na bosenga ya mbeki ya polele, ezali solo, Lingomba oyo ebengámi kobima, etonga moke mpenza oyo ekoyamba nguya pe mapamboli ya Nzambe pe Nsango na Ye. Aleluya! Yango nde tosengeli na yango.

³⁵⁵ Bókoma na bolembu mpo na kokóma na makasi. Ekolonga milimo mabe nyonso. Ekoyokisa bato ya mayele nsoni. Ekomema mibali pe basi baoyo Nzambe abéngi, bobele bango.

³⁵⁶ Bomikanisela: “Ndenge ezalaki na eleko ya Nowa, ekozala pe bongo na boyei ya Mwana na moto, milimo mwambe ebikisamaki.” Na eleko ya Eliya, bobele bato nkoto nsambo nde bazalaki na Yango. Oh, bókánisa naino esika tozali kobika sikawa. Ntango Yoane abandaki mosala, na ntembe te, lingomba moke ezalaki na bato moke mpenza, kasi bazalaki ba-mbeki ya polele, mpo na kosopa Mafuta kati na bango. Aleluya!

Nzambe, tika ete tótíkala polele biso moko.

³⁵⁷ Bótíkala polele, baninga. Bókóma na bolembu! Bóboya makoki na bino moko! Pe bino baoyo bozali koyoka na radio . . . na radio te, kasi na . . . baoyo bozali koyoka ba-bande oyo, bisika nyonso ekokóma, bótíkala mpenza polele. Bómipesa mobimba likolo na etumbelo ya Nzambe lokola mbeka. Tika Mwanje koya na likala ya Móto, pe kotondisa mbeki yango na nguya ya Nzambe-na-Nguya-nyonso. Bókóma . . . Bongo Akokómisa yo makasi, Akopesa yo ngolu mpo na kotelema ngwi.

Tógumba mitó mwa moke.

³⁵⁸ E Nkolo, ntongo ya lomingo mosusu euti koleka, pe tozali kofanda na eyanganelo ya malamu oyo, esika mibali pe basi bayebi Yo, esika Molimo na Yo efandi kati na mitema na bango, bandimeli Yo pe basalelaki Liloba nyonso oyo Yo—oyo Yo opesaki biso mitindo ya kosala. Pe totondi Yo mpo na bato oyo.

³⁵⁹ Pe ekoki kozala na bato mosusu na ekólo oyo, esika ba-bande oyo ekokende, esika basi pe mibali ya komikitisa bakomema yango na ba-ndako na bango pe na ba-mboka na bango, kino na bikólo mosusu. Pe tika ete báyoka, Nkolo, pe básosola, bábimisa nyonso kati na bango mpo Molimo Mosantu ákoka kotondisa bango.

³⁶⁰ Ekoki pe kozala na bamosusu awa na ntongo ya lelo, Nkolo, baoyo bako . . . basili kobimisa nyonso kati na bango uta tobandaki koloba, baoyo basosoli ete batalelaki mingi koleka makanisi na bango moko, ya bango moko, bango . . . makoki na bango moko, batalelaki ma—mayele ya makanisi na bango

moko ya bomoto, oyo ezali bobele mbindo liboso na Nzambe. E Nzambe, tika ete bákoka kobimisa mpenza nyonso kati na bango sikawa, bámikitisa bango mokona botosi pe bábelema mpo na kotondisama na Molimo. Kokisa yango, Nkolo.

Ekomami na Biblia: “Baoyo nyonso bandimaki bazuaki libatisi.”

³⁶¹ Na ntongo oyo, mwasi moko afandi awa, Tata, afandi awa na sima, pe nazali kokanisa ndenge Madame Hicks alandaki ngai awa na mpokwa moko, pe mwasi moko alalaki wana, atikalaki bobele mikuwa, misisá, mposo ya misisá na ye ebendanaki, cancer esilaki kolia ye mobimba; mobali na ye, azalaki naino Moklisto te. Pe nazali kokanisa libondeli oyo nabondelaki na mpokwa wana: “Nzambe, Yo nde otindaki Dawidi kolanda nkosi, bobele na bilingóngo ya mpamba, pe azongaki na mwana mpate.” Nalobaki: “Cancer oyo ekangi ndeko na ngai ya mwasi; ezali molimo mabe. Nayebi ete Ozali Nzambe. Namóná Yo, Nkolo, pe nayebi. Nasolólá na Yo, pe Oyanólá ngai.” “Nazali kolanda mpate ya Nzambe; cancer, tika ye!” Na sima, napesaki ya motindo na Nkombo na Yesu Klisto ete “Zonga na ndako”. Pe mobali na ye, oyo amipesaki naino te, andimaki Liloba yango pe amemaki mwasi na ye na ndako. Ye oyo afandi awa na ntongo ya lelo, mwasi monene ya nzoto makasi, cancer esilá nye, ayei na ntongo oyo mpo na kozua libatisi na Nkombo na Yesu Klisto. E Nzambe, totondi Yo mpo na mbeki yango ya polele, oyo ebelemi mpo na kotondisama. Nzambe, nabondeli ete Opambola molimo yango.

³⁶² Nkolo, oyo ezali bobele ndakisa moko kati na mingi mosusu. Nabondeli ete mapamboli na Yo ézala likolo na eyanganelo oyo, na eyongi, Nzambe, na eyongi. Soki . . .

³⁶³ Eloko bobele moko etikali, Tata, oyo nakoki komona, ezali, to komona Yo kotelema esika moko ná ba-mbeki ya polele mpo na koyokisa mokili oyo nsoni, to kotinda Yesu nokinoki. Ete, tokómi na suka, Nkolo, makambo ya kosala etikali bobele mibale (pe tosendeli komona yango mpenza sikawa) mpo toyebi ete ekómi na suka; to tokomona likambo moko ya nguya kosalema mpenza sikawa, to tokomona Boyei na Nkolo.

³⁶⁴ Masakoli nyonso ekokisami. Likambo ya suka liboso na Lingomba kosékwa, liboso na Yango konétolama na Emoniseli mokapo ya 3, ezalaki boyei ya motindami ya Eleko ya Lingomba ya Laodikia, oyo “akozongisa mitema ya bato epai na batata ya ebandeli,” kozongisa bango na Pantekote ya solosolo, oyo balobaka bazali na yango. Ekozala na bato nkoto na nkoto mbala na nkoto na nkoto, ndenge ezalaki na ntango ya Nowa, Nkolo, oyo bakobunga. Mingi kati na bango bakobunga. Tosili komona yango kokokisama, Tata.

³⁶⁵ Yaka, Nkolo Yesu, mema Lingomba na Yo. Pe soki ezali mokano na Yo, Nkolo, liboso Lingomba yango konétolama, tika

ete Nguya éfuluka. E Nzambe, tondisa ba-mbeki oyo. Telemisa bango, Nkolo! Ningisa mokili oyo mbala moko lisusu! Toyebi ete ngonga ekosila, kobongola motema ekozala lisusu te, ekokóma mosika mingi mpo na bango na ntango wana. Kasi talisa Nguya na Yo, Nkolo, tondisa ba-mbeki yango pe ningisa mokili oyo ndenge eningisámá naino te liboso! Na sima, memá Lingomba na Yo. Tika mokili na mobulu na yango oyo emikotisa na yango, E Nzambe, bazali kobunda.

³⁶⁶ Bongo, toyebi ete Molimo Mosantu ya nkembo akokende epai na Bayuda na sima. Wana tomoni ba-nkoto mokama na ntuku minei na minei likolo na Ngomba Sinai, batelemi elongo na Mwana Mpate, kasi Mwasi na libala asilaki kokota na Lola. Asilaki konetolama, pe Mwana Mpate azongaki (Yosefe) mpo na komitalisa na libota na Ye. Pe Biblia elobi ete kokabwana ekozala kati na bango ntango bakotala pe bakomona Ye kotelema wana. Ntango Akomitalisa, bakoloba: “Bilembo ya bam-pota oyo Ozui yango wapi?”

Alobaki: “Na ndako ya baninga na Ngai.”

Bongo bakoloba: “Ezali Ye oyo biso tobomaki.”

³⁶⁷ Pe Akoloba lokola Yosefe: “Bómitungisa te, mpo Nzambe nde asalaki bongo mpo na kobikisa bomoi ya Mabota. Ezalaki mabé na bino te.” Bongo balobaki ete bakokabwana, libota moko na mosusu, bakolela lokola mwana na likinda oyo akufi na libota.

³⁶⁸ E Tata, mokolo yango ekómi pene, yango nde suka ya Mposo Ntuku Nsambo wana. Ete ntango ekómi pene, Nkolo.

³⁶⁹ E Nzambe, tika ete mongongo—mongongo ya basakoli ya Nzambe ya solo épamela mwasi yango ya mikolo oyo, lingomba yango ya mikolo oyo, likindo ya mangomba ya mikolo oyo.

³⁷⁰ Ningisa batei oyo bazali kobanga koteya Solo. E Nzambe, kamata bato oyo pe ningisa bango lokola esalémá naino te, sala ete bamiyoka nsoni.

³⁷¹ Kasi toyebi likambo moko oyo, pe tokoki kopema na elikya nyonso, ete: “Moko te akoya soki Tata abendi ye te. Pe baoyo nyonso Tata apési bakoya.” Bakokóma mpenza lokola Yo nde osili kokáná yango. Kasi Olobaki: “Bóbanga te, etonga moke, mpo Tata na bino aseveli kopesa bino Bokonzi.” Toyebi ete Ezali solo. Okébisaki biso longwa ebandeli ete ekozala bato moke, bato moke mpenza baoyo bakomilengela ntango eleko yango ekokóma. Bongo, lisekwa monene ekosalema, pe basíkolami nyonso baoyo basíkolamaki kati na bileko bakosekwa. Kasi na eleko oyo ya suka, na ntango ya suka, Lingomba ekozala mpenza na bato moke.

³⁷² Na bongo, tomoni yango, Tata, tomoni Nsango ya lelo. Tomoni ndenge bato baboyi Yango, tomoni bokabwani, tomoni makambo nyonso oyo.

373 Tozali komona libota na Yo kotatola ete bazali te...ete bazali “mpamba”. Bazali bobele na mposa ya kotondisama na Yo, Nkolo. Sikawa, nabodeli ete Óningisa mokili na nzela na bango, mwa mikolo moke mpenza, liboso na Boyei na Nkolo.

374 Sikawa, kati na biso, babeli bazali, bato mosusu basengeli na lobiko ya nzoto. Tokotika bango te, Nkolo, mpamba te elobami: “Kobosana bolamu na Ye nyonso te, Ye oyo alimbisaka masumu na yo nyonso ya nko, pe Abikisaka bokono na biso nyonso.” Tobondeli ete nguya na Ye monene ya kobikisa ézala likolo na moto nyonso oyo azali awa. Soki Okoki kobikisa molimo moko kuna, kozanga koningana, bobele motema na ye oyo etali epai na Yo, koleka boni Okoki kobikisa nzoto!

375 Bilamba ya mabondeli ezali awa. Napamboli yango na Nkombo na Nkolo Yesu, ndenge ntoma monene Polo asalaki. Tika ete moto nyonso oyo akolata elambá oyo ábikisama. Tika ete mabota oyo ekabwanaki ézonga na boyokani. Tika ete bana mike, bazángá tata, bazángá mama, pe baoyo bakabwáná, tika ete libota yango ésangisama lisusu. Kokisa yango, Nkolo. Bikisa babeli nyonso sikawa, ná bato na bolozu, zua nkembo mpo na Yo mei.

376 Pe, Nkolo, biso baoyo tozali komeka kotelemisa ba-mbeki na biso, kotombola miso na biso, ná mitema na biso epai na Yo, koboya ata kondima kozala bato ya mokili oyo. Biblia elobi ete “Abalayama atikaki ndako na ye, atikaki engumba na ye, mpo na kofanda na mboka ya elaka, kotatola ete azalaki ‘moto ya mokili oyo te’ kasi azalaki ‘moleki nzela pe mopaya.’” Abalayama, Isaka pe Yakobo, baoyo nyonso bazalaki na litatoli oyo, ete “bazali ya mokili oyo te”, bazalaki bobele kotatola ete Engumba moko ezali, oyo Motongi pe Mosali na Yango ezali Nzambe, pe bazali kolanda nzela yango.

377 Tika ete mitema ébongwana sikawa mpenza wana nazali kobondela, Tata, pe tika ete lolenge malamú ézuama. Pe ntango mosala ya libatisi ekobanda, tika ete koningana makasi ézala kati na bato, tika ete, baoyo bakanísá naino te mpo na yango, tika ete émonisamela bango. Pe Olobaki ete bato nyonso oyo Yo obéngáki, O—Okotinda bango.

378 Sikawa, natiki nyonso na maboko na Yo, Nkolo, ná mwa liteya ya biteni-biteni oyo euti na mbeki moko ya mpamba, oyo ezali na eloko moko te kati na yango, Nkolo. Nabondeli ete Ókamata Maloba yango pe Ókotisa yango na mitema ya bato, pe tika ete bázanga makoki ya kotangwa mosika na Yango. Kokisa yango, Nkolo. Natiki yango na maboko na Yo sikawa, na Nkombo na Yesu Klisto. Amen.

379 [Ndeko moko apesi lisakoli—N.D.E.] Wana bozali kozua mokano, bózua mokano. “Mpo na nini botelemi katikati na makanisi mibale?” Bosili koyoka makambo Ye alobi. Soki Nzambe azali Nzambe, bósalela Ye; soki mokili ezali nzambe,

bokende liboso. Bomoni? Soki nzela ya bibongiseli ezali malamamu, bokoba na yango; kasi soki Biblia nde ezali malamamu, na bongo bobélema na Yango. Bomoni? Bópona sikawa nani bokosalela.

³⁸⁰ Sikawa, kati na Molimo, tóyemba loyembo moko. Biblia elobi: “Bayembaki loyembo pe babimaki.” Tóyemba loyembo ya kala oyo eyebáni mingi, *Nalingi Ye*, wana togumbi mitó pe mitema liboso na Ye.

Nalingi Ye,

Sikawa, zua mokano ya likambo nini soki okosala.

Nalingi Ye

Mpo Alingaki ngai liboso

Pe Asombi lobiko na ngai

Na ekulusu ya Kalvari.

³⁸¹ [Ndeko Branham abandi koyemba na nse ya mongongo *Nalingi Ye*—N.D.E.] Okoki kozua mokano mpo na Klisto? Ezali mpenza mokano te, bimisa nyonso ezali kati na yo: “Nkolo, nazali na ntina moko te. Eloko ya malamamu ezali kati na ngai te. Tika ngai kobosana nyonso nasilá koyeba. Sikawa yaka, Nkolo Yesu, kotika te ete éleka ngai motó. Tika ngai koyamba Yango pe kotondisama na Molimo na Yo, Nkolo. Kobanda lelo, tika ngai kozala mobimba wa Yo.” Sikawa bondela, libondeli ya mokuse epai na Nzambe; libondeli oyo ya pete, bana, bino nyonso.

Yo Mwana Mpate ya Kalvari,

Nzambe Mobikisi; (yambola na motema na yo)

. . .yoka ngai wana nazali kobondela,

Longola masumu na ngai nyonso,

E tika ete kobanda lelo

Kozala mobimba wa Yo!

Ezali ngai kotambola na molili ya bomoi,

Pe mawa ezingi ngai,

Zala Mokambi na ngai;

Tika ete molili ékóma pole,

Longola nsomo, kobanga,

Kotika te ete nábunga lisusu

Mosika na Yo.

³⁸² [Ndeko Branham abandi koyemba na nse ya mongongo *Kondima Na Ngai Etali Likolo Epai Na Yo*—N.D.E.] Bino baoyo bondimi, bóbimisa nyonso kati na bino liboso na Nzambe, pe bózua mokano ete eloko moko te ekopekisa bino lisusu, bokoloba lisusu te ete bozali na makoki, pe bolingi kobongisa makambo, komibongisa mpenza mobimba libobo na Nzambe, ebátiselo ezali na mai kati na yango, eléngelami mpo na libatisi. Basi bákende na loboko na ngai ya mobali, pe mibali na loboko na ngai ya mwasi. Etikali moke mosala ya kobatisa ekobanda. Baoyo babimisi nyonso kati na bango, bobelemi te mpo na kondima makambo batei bakoloba, makambo bakonzi ya mangomba bakoloba, makambo bibongiseli ekoloba, kasi

bokolanda nzela ya Nkolo, bokondima YANGO ELOBI NKOLO, boya sikawa.

Ezali ngai kotambola na molili ya bomoi,

Basi bakozala na loboko *oyo*, mibali na loboko *oyo*. Yango nde kobengama na bino na etumbelo: “Bato nyonso oyo bandimaki, bayaki pe bazuaki libatisi.”

. . . Mokambi na ngai;
Tika ete molili ékóma pole,
Longola mpisoli ya mawa,
Kotika te ete nábunga lisusu
Mosika na Yo.

³⁸³ Basi boni bazali awa na ntongo oyo. . . Nazali koloba yango na Nkombo na Nkolo Yesu! Boni kati na bino boyoki nsoni mpo na suki ya mikuse oyo bozali na yango, bolingi ete Nzambe (na ngolu na Ye) ákólisa yango mpo na bino? Nzambe ápambola bino.

³⁸⁴ Mibali boni boyoki nsoni mpo botikaka basi na bino komela makaya, pe kolata ba—patalons oyo ezali mpenza mpo na bino?

³⁸⁵ Pe Biblia elobi: “Ezali mbindo na miso na Nzambe.” Boyebi ete Nzambe akoki kobongwana te? Akoki kobongwana te. Azali na ezaleli moko, ezali bosantu. Akoki kobongwana te. Soki okómi lokola Ye te, okomona Ye te, “Kozanga bosantu, moto moko te akomona Nkolo.” Pe soki kolata ba—patalons ezali. . . epesaka Nzambe mpasi pe mposa ya kosánza, epesaka Ye mpasi, pe *mbindo*, “bosoto,” ndenge nini yo. . . na molimo ya ndenge wana kati na yo, okokóta Lola ndenge nini? Okokota na Lola ndenge nini ná suki ya kokatámá, ntango Nzambe alobi: “Ezali nsoni mpo na mwasi kokata suki na ye”? Azali koboya mibeko mpenza ya kozala mwa—mwasi. Nzambe abongwanaka te. Yango nde Liloba na Ye, moninga, ezali malamú mpo na yo koyoka.

³⁸⁶ Pe bino mibali baoyo botikaka basi na bino kosála bongo, bomiyokaka nsoni te? Boyokaka nsoni te?

³⁸⁷ Bózala lokola Mwasi Mokonzi ya mboka te. Bózala lokola Nzambe! Bomoni? Bóbimisa kati na bino lolenge nyonso ya makambo ya mokili oyo, mpo Klisto Ákoka komisopa kati na yo pe ókoka kotondisama mpenza na Molimo Mosantu.

³⁸⁸ Akoki kosala yango te, Akoki kosala yango te, ezali—ezali kotelemela mibeko na Ye; ekosengela na Ye kotelemela Liloba na Ye, pe oyo wana Akosala yango te; Akosala yango te soki naino yo—yo olongobani na Liloba na Ye te. Osengeli kokóma. . . Tosengeli kokóma Wana liboso likambo mosusu nyonso ékoka kosalema. Boyebi yango, bino nyonso boyebi yango malamú. Bato boni bandimi yango, bótombola maboko. Ya solo, bondimi yango, sikawa tósala likambo moko mpo na yango.

³⁸⁹ Nzambe, yókela biso mawa! Tozali mpenza na mposa na Ye! Biso oyo, biso nyonso elongo sikawa. Bomikanisela sikawa, na

Esambiselo, soki ngai . . . ekosengela na ngai kotelema (pe ekoki kosalema liboso na butú koyinda) mpo na kokutana na Liloba nyonso nalobaki. Bomoni, nasengeli kokutana na yango. Sikawa, bomikanisela ete lisumu na nko yango ezali lisusu na maboko na ngai te, ezali lisusu na lisosoli na ngai te, ezali lisusu na molimo na ngai te, ezali lisusu epai na Nzambe te.

³⁹⁰ Soki ozali te . . . Soki ozali na lolenge wana pe ozali naino koyoka kokweisama te (fiu!), oko—oko—okosala nini? Na bongo, oyebi ete Nzambe azali kosala elongo na yo te, oyebi ete osíli koleka Yango. Omoni? Osíli koleka Yango. Okoki kozala mpenza mosambeli, okoki kozala moto ya mangomba pe bongo na bongo, kasi osíli koleka Yango. Liloba na Nzambe ezindaka na kati mpo na kobimisa moto libanda. Yango nde ezongisaka bango. Bomoni? Boye, yango nde Liloba. Nasengi na motei nyonso, na moto nyonso, bisika nyonso, koloba soki Yango etelemeli Liloba na Nzambe. Ya solo. Ezali bongo te, bomoni.

³⁹¹ Na bongo, tika ete tózala mpenza Baklisto. Ata biso baoyo tomekaka, baoyo tomekaka, tosengeli kokatama pe kotokisama mpenza. Iyo, misie, biso nyonso tosengeli na yango.

³⁹² Nzambe, yokela ngai mawa. Nzambe, zua ngai pe bongola ngai. Ezali mposa ya motema na ngai, sima na mposa oyo, kokende liboso na Nzambe, mpo na koluka koyeba eloko nasengeli kosala na sima. Nzambe, zua ngai. Nini . . . Nyonso—nyonso oyo etali ngai (pe ezali mingi) oyo ezali malamú te, Nzambe, longola yango, yango nde libondeli na ngai na ntongo oyo. Kata ngenga na motema na ngai, na matoi, na bomoto na ngai. Kómisa ngai, Nkolo, kómisa ngai eloko oyo . . . nyonso oyo Alingi ngai kozala. Yango nde libondeli na ngai.

³⁹³ Ata nasengeli kozala nini, kata, kata-kata ngai, Nkolo. Lakisa ngai kati na Liloba, yebisa ngai, nakokende kosala yango. Soki Nkolo alobi yango, nako . . . ngai wana, nabelemi mpo na komikokisa na yango. Ata Liloba na Nzambe elobi nini, yango nde nalingi kozala. Nalingi kozala Mo—Moklisto kati na Liloba na Nzambe: “Kotika maloba nyonso ya moto kozala lokuta, pe ya Nzambe kozala solo.” Yango nde kolanda ngámbo ya eleko oyo te, boye te? Ondimi yango ndenge wana?

³⁹⁴ Mwana, ozali koluka esika mpo na libatisi? Iyo, na ngámbo oyo, ndeko, kozala te. Malamú, bobele na ngámbo oyo.

³⁹⁵ Mingi kati na bino basengelaki koya, mibali ná basi baoyo bazali bandimi, baoyo bazali . . . bazali koyambola masumu na bango, mpo na kozua libatisi na Nkombo na Yesu Klisto. (Ngambo oyo, ndeko.) “Na Nkombo na Yesu Klisto mpo na bolimbisi na masumu na bango, pe bakotondisama na Molimo Mosantu.”

³⁹⁶ Sikawa, bino ba-Katoliko oyo bozali awa, yango nde bolimbisi ya masumu. Bolobaka ete lingomba ezali na nguya ya kolimbisa masumu, lingomba elimbisaka masumu ndenge nini?

Nzambe . . . Yesu nde alobaki na lingomba: “Ye oyo bokolimbisa masumu na ye, ekolimbisamela ye. Ye oyo bokokangela ye yango, ekokangamela bango.” Liboso, bazalaki kolimbisa masumu ndenge nini na lingomba ya ebandeli? Bamemaki bango kobongola mitema, pe babatisaki bango na Nkombo na Yesu Klisto mpo na bolimbisi ya masumu na bango. Na mwa ndako ya ntúbélá te; te, ata moke te. Kasi bayambolaki liboso na Nzambe, na mitema na bango ntango bazalaki wana, pe bandimaki. “Pe baoyo nyonso babatis- . . . bandimaki, babatisamaki na Nkombo na Yesu Klisto, pe batondisamaki na Molimo Mosantu.” Amen. Bolingi Ye?

Sikawa tótelema.

³⁹⁷ Sikawa, ekozala na bato mingi oyo bazali kozela mosala ya libatisi. Moto mosusu alingi koya, moto mosusu oyo andimi? Boya, na ngámbo nyonso mibale; mibali na loboko ya mwasi; na loboko ya mobali, basi. Bondimela Nkolo Yesu na motema na bino mobimba, ná nyonso ezali kati na bino.

³⁹⁸ Sikawa tógumba mito na biso elongo, wana tozali kozongela libondeli ya ndakisa oyo elongo, ndenge nakambami na lolenge mosusu mpenza mpo na kosala yango sikawa. Wana togumbi mitó na biso, bóbondela elongo na ngai. [Ndeko Branham ná eyanganelo babondeli elongo—N.D.E.]

. . . Tata na biso Ozali na likolo, Nkombo na Yo ébulisama.


Bokonzi na Yo éya. Mokano na Yo ésalema na mabelé, lokola na likolo.

Pesa biso lelo bilei na biso na mokolo na mokolo.

Pe limbisa biso mabe na biso, ndenge biso pe tolimbisaka baoyo basalaka biso mabe.

Pe salisa biso tókwea na komekama te, kasi bikisa biso na mabe: mpamba te bokonzi, nguya pe nkembo ezali ya yo, libela na libela. Amen.

³⁹⁹ Sikawa tókoba kogumba mitó na biso. Pe nakosenga na Ndeko Neville koya pe kosenga mapamboli, koloba oyo ezali na motema na ye, na sima akopésa liyebisi mpo na mosala ya libatisi oyo ezali kolengelama sikawa.

⁴⁰⁰ Nzambe ápambola bino, yango nde libondeli na ngai. Ngai nakobondela mpo na bino, bino pe bobondela mpo na ngai. Nasengeli mpenza na mabondeli na bino. 

MAKASI EBONGI BE NA NZELA YA BOLEMBU EBONGI BE LIN61-1119
(Perfect Strength By Perfect Weakness)

Liteya oyo ya Ndeko William Marrion Branham, eteyamaki liboso na Ngelesa mokolo mwa lomingo na ntongo, mokolo mwa 19, sanza ya zomi na moko, na mobu 1961, na Branham Tabernacle, na Jeffersonville, Indiana, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2016 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org